

ዮሐንስ አጁታ ጊዶ ቆፋ

ዮሐንስ አጁታይ ገፌቲዳይ አማኒዛይቲ ዮሱስ ኪርስቶሲ ኢስታስ ጎዳ ጊዲዳይሳ ኤሪዲ አማኒዳ ጊሽ ጎዴቴሲኔ ዋዬይ ኢስታ ቦላ ጋኪዳ ዎዴና። ገፌዚ ማፃፋዛ ናባቢዛይቲ ባ ሂዶታ ቃንዎንታ ማላ ኢስታ ሚንፎላናሲኔ ቤና ጋኪዳ ጎዴቴላኒኔ ሜቶ ጋርሳን ኢስቲ ባ አማኖን ሚኒ ኤቃና ማላ ሚንፎላናሳ።

ሃ ማፃፋን ዳሪዛ ባጋይ ዳሮ ዱማ ዱማ ኦይኬቲ ዲዛ አጁታታ ኢሲ ቦላ ጋሕ ኦይኪዴስ፤ አጁታቲካ ሄ ዎዴ ዲዛ አማኒዛ አሳይ ኤራናስ ዳንዳዬዛዚ ጊዲሺን ሃንኮ አሳስ ቃስ ጌሎንታ ፀራ ጊዲዲ ሺቂዳ ሌሚሶ ማላን ሺቂዳ ዮዎኮ። ሺሪ ሺሪ ዮዲዛ ማላ ማፃፋዛስ ዋና ቆፋቲ ዱማ ዱማ አጁታታ ባጋራ ዱማ ዱማ ሜዳን ዛሬቲ ዛሬቲ ሺቂዳ። ሃ ማፃፋዛ ቢርሼሴ ዱማ ዱማ ጊዲኮካ ኢዛስ ኦይፌ ቆፋይ ቃስ ቆንጩ። ሄሲካ ያሲ ጎዳ ዮሱሳ ባጋራ ናምፃንሶይ ባይንዳ ኦጌራ ገላጌራ ኢዛ ሞርኬታ ዉርሲ ያናና። ሄ ያኖዚካ ዉሪዳፔ ጉዬ ባስ አማኔቲዳ ባ ላጌታስ ኢዚ ኦራሳ ሳሎኔ ኦራሳ ቢታ ኦንጆ ላቲሳና ጊዛይሳ።

- ሃ ማፃፋይ ኦይኪዳ ኩሜሳ ቆፋ
- ጌሎሶ 1:1-8
- ኮይሮ ቤቲዳ አጁታ 1:9-20
- ላፑን ዎሳ ኬሳታስ ዮዴቲዳ ኪታታ 2:1-3:22
- ማፃፋዛኔ ላፑን ማታሜታ 4:1-8:1
- ላፑን ፀሩምባታ 8:2-11:19
- ዳዌዛኔ ናምዑ ዶዓታ 12:1-13:18
- ዱማ ዱማ አጁታታ 14:1-15:8
- ያሳ ሃንቆ ፀዓታ ላፑናታ 16:1-21
- ባቢሎኔ ኩንዴሰ፥ ዶዓዛ ዎርዶ ናቤታኔ ዳቡሎሳ ያኔቴሰ 17:1-20:10
- ዉርሴሳ ፒርዳ 20:11-15
- ኦራሳ ሳሎ፥ ኦራሳ ቢታኔ ኦራሳ ዮሩሳላሜ 21:1-22:5 ኩሻ ቆፋ 22:6-21

1 ሃይሲ አጁታዚ ማታ ዎዴ ቢታ ቦላ ሃናናይሳ ባስ አሲዛይታ ቤሳና ማላ ያሲ ዮሱስ ኪርስቶሳስ ኢሚዳይሳ። ዮሱስ ኪርስቶሶኪ ባ ኪታንቻ ኪቲዲ ባ ኦሳንቻዛ ዮሐንስ ሃይሳ አጁታዛ ቆንጩሲዴስ። 2 ዮሐንሲካ ያሳ ቃላ ጊሺኔ ዮሱስ ኪርስቶሲ

ታማርሲዳ ቱማ ጊሽ ቃሴካ ኢዚ ባ አይፌን ቤዩዳይሳካ ወርሲ ማርካቲዴስ።³ ሃይሲ ወሪካ ሃናናይ ማታ ዎዴን ጊዲዳ ጊሽ ሃይሳ ቲንቢቱ ቃላ ናባቢዛ አሲ አንጄቲዳዴ። ሄሳሳካ ቲንቢቱ ቃላ ሲዩዳይቲኔ ሃ ቲንቢቱ ቃላ ፃፌቲዳይሳ ፖሊ አሲዳይቲ ኢስቲ አንጄቲዳይታ።

ኢሲያን ዲዛ ላፑን ዎሳ ኬሳታስ ኪቴቲዳ ሳሮካ

4-5 ኢሲያን ዲዛ ላፑን ዎሳ ኬሳታስ ካሴካ ዲዛይሳፌ፥ ሃዲካ ዲዛይሳፌ፥ * ቡሮካ ያና ያሳፌ ኢዛ አልጋ ሲንሳን ዲዛ ላፑን አያናታፔ ሄሳሳካ ሃይቆፔ ዴንሳን ባይራ ጊዲዳይሳፌ፥ ሃ ቢታ ካዎታስ ካዎኔ አማኔቲዳ ማርካ ጊዲዳይሳፌ፥ ኑና ሲቁዛይሳፌ፤ ባ ሱሳን ኑና ኑ ናጋራፔ ጌሺዳ ዩሱስ ኪርስቶሳፔ ኪያቴሴ፤ ሳሮቴሴ ኢንቴስ ጊዶ። * 6 ኑኔ ዩሱስ ኪርስቶሳ አዋ ያሳስ አሳና ማላ ኑና ኢዚ ካዎታኔ ቁሴታ ኬሲዳ ዩሱስ ኪርስቶሳስ ቦንሾይኔ ዎልቃይ ሜርናፔ ሜርና ጋካናስ ኢዛስ ጊዶ! አሚን። *

7 ሄኮ ኢዚ ሳሎፔ ሻራራ ጊታ ቦንሾራ ያና። ካሴ ኢዛ ጫዲ ዎዲዳይቲካ አቶንታ አሲ ወሪካ ኢዛ ቤያና። ቢታ ቦላ ዲዛ ዴሬይካ ወሪካ ኢዛ ጊሽ ዩካና። ሃይሲ ሃ ዮገዚ ቱሙኮ! አሚን። *

8 ካሴካ፥ ሃዲካ ዲዛይሲ ቡሮፔካ ያናይሲ ወርሲ ዳንዳዩዛ ጎዳ ያሲ “አልፋይኔ አሜጋይ፥ ኮይሮይኔ ወርሴሴ ታና” ጌስ። *

ኪርስቶሲ አጃታን ቆንጨሺን

9 ታኔ ዩሱሳ ዋዩዛ ኢዛ ካዎቴሳ ቃሴካ ኢዛ ዳንዳያን ኢንቴናራ ኢሲፌ ጊዲዳ ታ ኢንቴ ኢሻይ ዮሃኒሲ ያሳ ቃላኒኔ ዩሱሳስ ማርካቲዳ ጊሽ ቃሼታዳ ፊዒሞ ጌቴቲዛ አባ ጊዶን ዲዛ ዴሬ ዳሪን ዳይስ። 10 ታኔ ጎዳ ጋላስ ዒሎ አያናን ዲስኮ ማላ ጮ ሊጲጲ ጊሺን ዲንኬ ጊሪሳ ማላይ ጊታ ጊሪስ ታፔ ጉዩራ፥ 11 “ኔኒ ቤዩዳይሳ ዋራቃታን ፃፋዳ ላፑን ዎሳ ኬሳታስ ሄይቲካ ኤፕሶኔስ፥ ሳሜርኔሴስ፥ ጴርጋሞኔስ፥ ቲያዒሮኔስ፥ ሳርዴሴስ፥ ፕላዴልፊያሲኔ ሎዶቂያስ ዩዳ” ጊሺን ሲያዲስ።

12 ሄሳ ታስ አኒ ዮቴዳኮኔ ኤራና ጋዳ ታ ጉዩ ዩያ ዒሊዛ ዎዴ ያምፔ ኢስታ ቦላ ዎሲዛ ዎርቃፌ አሴቲዳ ላፑን ባላታ ቤያዲስ። 13 ሄ ኢስታ ቦላ ያምፔ ዎሲዛ ባላታ ጊዶን አሳ ና ሚሳቲዛዴ ዴማዲስ። ኢዚካ ሂርኪ ቶሆ ቁርጴ ጋኪዛ አዳሳ

* 1:4-5 ኬሳ 3:14፤ አጃ 4:5 * 1:4-5 ኢሳ 55:4፤ ማዛ 89:27 * 1:6 ኬሳ 19:6፤ አጃ 5:10 * 1:7 ዳኔ 7:13፤ ማቶ 24:30፤ ማር 13:26፤ ሉቃ 21:27፤ 1ታሶ 4:17፤ ዛካ 12:10፤ ዮሃ 19:34፥37 * 1:8 ኬሳ 3:14

ማይያ ማይዲዴስ፤ ቲራ ቦላካ ዎርቃ ማይያ ማይዲዴስ። *
 14 ኢዛ ሁዔይኔ ኢዛ ሁዔ ቢናናይ ቃስ ቦላ ሻቸ ሚሳቲዛ ቦላ ሱፌ ጌቴቲዛ ካላ ማላ። ኢዛ አይፌቲካ ታማ ላጮ ሚሳቴቴስ።
 * 15 ኢዛ ቶሆቲ ታማ ቦንቆን ቆፃቲ ኬዚዳ ፃርቂማላ ሚሳቴቴስ።
 ኢዛ ቃላይካ ዎልቃማ ፒሳ ሃሴ ጊሪዛ ማላ ጊሬስ። * 16 ኢዚ ባ ኡሻቸ ኩሼን ላፑን ያሊንቴታ አይኪዲ ኡቲዴስ። ኢዛ ዱናፕ ናምዑ ባጋራ ቃራ ማሻይ ኬዜስ። ኢዛ አይፌሶይ አዎ አርሼ ማላ ያልቁቴስ።

17 ታኒ ሄሳ ቤያዳ ሃይቂዳ አስ ሚሳታዳ ኢዛ ቶሆ ጋርሳን ኩንዳዲስ። ኢዚ ቃስ ታ ቦላ ባ ኡሻቸ ኩሼ ዎሲዲ “ኔ ባቦፋ! ከይሮይኔ ወርሴሲ ታና። * 18 ታኒ ፓፃ ዳይስ። ካሴ ሃይቃዲስኮሼን ሄኮ ታኒ ሃይሳፌ ሜርናስ ፓፃ ዳና። ሃይቆ ቦላኔ ሲያሌ ቦላ ታኒ ኅዳ። 19 ሄሳ ጊሽ ኔኒ ቤዩዳይሳ ሃዲ ዲዛይሳኔ ጉዩፕ ሃናናይሳ ፃፋ። 20 ኔኒ ታ ኡሻቸ ኩሼን ቤዩዳ ላፑን ያሊንቴታኔ ያምፔ ኢስታ ቦላ ዎሲዛ ዎርቃፌ አሴቲዳ ላፑን ባላታ ፁራይ ሄኮ ሃይሳ። ላፑን ያሊንቴቲ ላፑን ዎሳ ኬላታ ኪታንቻታ። ያምፔ ኢስታ ቦላ ዎሲዛ ላፑን ዎርቃ ባላቲ ላፑን ዎሳ ኬላታ።”

2

ኤፌሶኔ ዎሳ ኬላ

1 “ኤፌሶኔን ዎሳ ኬላ ኪታንቻስ ‘ሃይሲ ላፑን ያሊንቴታ ባ ኡሻቸ ኩሼን አይኪዳዴፌኔ ኢስታ ቦላ ያምፔ ዎሲዛ ላፑን ዎርቃ ባላታ ጊዶን ሲሜሬቲዛዴፌ ዮቴቲዴስ። 2 ታኒ ኔ አሶዛ፣ ዳፌቴሳኔ ዳንዳያካ ኤራይስ። ኔኒ ቃስ ኢታታ ዩጋ አዳናስ ዳንዳዮንታይሳ ሃዎሬታ ጊዶንታ ዲሼ ባና ሃዎሬታ ጊዛይታካ ሻካዳ ኢስቲ ዎርዳንቻታ ጊዶይሳ ኔ ጋካ ዴሚዳይሳ ታ ኤራይስ። 3 ኔኒ ዳንዳያን ሚና ኤቂዳይሳኔ ታ ሱንሳ ጊሽ ሳሌቶንታ ኔ ዎዩ ቤዩዳይሳ ታ ኤራይስ። 4 ጊዲኮካ ታ ኔና ካዲዛ ኢሲ ሚሼ ዴስ። ሄሲካ ኔኒ ካሴ ኔ ሲቆዛ አጋዳሳ። 5 ኔኒ ካሴ አይ ማላ ዶቃሶን ዳሼ ሃዲ ቃስ ኔ ዎና ኩንዲዳኮኔ አኔ ዩሻ ቆፓዳ ማሮቴሳን ሲማ ጌላ። ኔ ካሴ አሲዛ ቤኒ ኔ አሶዛ ዛራ አሳ። ኔ ሄሳ ወርሳ ዛራ አሶንታ ኢዲኮ ታ ኔኮ ያና። ኔኒ ማሮቴሳን ጌሎንታ ኢዲኮ ኔ ያምፔ ኢዛ ቦላ ዎሲዛ ባላ ሄ ኢዚ ዲዛሶፕ ታ ዴንሳዩቻና። 6 ጊዶ አቲን ታ ኔና ጋላቲዛ ኢሲ ሚሼ ዴስ። ሄሲካ ታኒ ኢዲዛ ኒቆላ ባጋ አሳ አሶ ኔካ ኢዳዳሳ።

* 1:13 ዳኔ 7:13፤ 10:5 * 1:14 ዳኔ 7:9፤ 10:6 * 1:15 ሂዚ 1:24፤ 43:2 * 1:17 ኢሳ 44:6፤ 48:12፤ አጃ 2:8፤ 22:13

7 “አያናይ ዎሳ ኬሳታስ ጊዛይሳ ሃይሲ ዲዛዴይ ዉሪካ ሲዮ!
‘የኒዳዴይ ዎሳ ጋናቴ ጊዶን ዲዛ ዴዎ ሚሳ አይፌ ማና ማላ ታ
አሳና።’

ሳማርኔሴ ዎሳ ኬሳ

8 “ሳማርኔሴ ዎሳ ኬሳ ኪታንቻስ፣ ሃይሲ ኮይሮኔ ዉርሴስ
ጊዲዳይሳፌ ካሴ ሃይቂዳይሳፌኔ ሃዲ ቃስ ፓፃ ዲዛይሳፌ
ዮቴቲዳዛ። * 9 ታኒ ኔ ዋዬዛኔ ኔ ማንቆቴሳ ኤራይስ። ጊዲኮካ ኔኒ
ዱሬኮ። አይሁዳ ጊዶንታ ዲሼ ባና ኑኒ አይሁዳኮ ጊዛ ፃላፌ ማባራ
ጊዲዳይቲ ሄይቲ ኔ ሱንስ ሞሮይሳ ታ ኤራይስ። 10 ቡሮ ሲንሳፌ
ኔ ቦላ ጋካና ሜቶስ ባቦፋ። ኢንቴ ፓጩታና ማላ ኢንቴፌ ኢሲ
ኢሲ አስ ዳቡሎሲ ቃሾ ኬሴ ጌልሳና። ታሙ ጋላስ ጋካናስ
ኢንቴ ዋዬ ቤያናሺን ኔ ሃይቃና ጋካናስ አማኔቲዳዴ ጊዳ። ታኒ
ኔስ ሜርና ዴዎ አክሊሴ ሂስታ ኢማና።

11 “አያናይ ዎሳ ኬሳታስ ጊዛይሳ ሃይሲ ዲዛዴይ ሲዮ!
የኒዳዴይ ናምፃንሳ ሃይቆን ቆሄቴና” ጋ ፃፋ ጊዴስ። *

ጴርጋሞኔ ዎሳ ኬሳ

12 ጴርጋሞኔ ዎሳ ኬሳ ኪታንቻስ “ሃይሲ ናምዑ ባጋራ ቃራ
ማሻ አይኪዳይሳፌ ዮቴቲዳዛ። 13 ኔኒ ፃላፌ አልጋይ ዲዛሶን
ዲዛይሳ ታኒ ኤራይስ። ጊዶ አቲን ኔኒ ታ ሱንሳ ሎዔሳ አይካዳሳ።
ኔ ታና አማኒዛይሳ አጋቤይካ። ታስ አማኔቲዳ ማርካ ጊዲዳ
አንቲጳሲ ፃላፌ ዲዛ ኢንቴ ካታማን አሳ ኩሼን ሃይቂዳ ዎዴካ ኔ
ታና አማኖ አጋቤይካ። 14 ጊዲኮካ ታ ኔና ካዲዛ ኢሲ ሚሺ ኔ ቦላ
ዴስ። ሄሲካ ባላዓሜ ቲሚርቴ አይኪዳ ኢሲ ኢሲ አሳቲ ኢንቴ
ጊዶን ዴቴስ። ሄሲ ባላዓሜይ ኢስራዔሌ አሳይ ኤቃስ ያርሼቲዳ
ካስ ሚዲኔ ላይማ ላይማቲዲ ዱጴታና ማላ ባላቁ ዞሪዳዴ። *
15 ሄሳሶካ ኒቆላ ባጋ አሳታ ቲሚርቴ አይኪዳ አሳቲካ ኢንቴ ጊዶን
ዴቴስ። 16 ሄሳ ጊሽ ማሮቴሳን ጌላ፤ አካይ ጊኮ ታኒ ኤሴሳዳ ኔኮ
ባዳ ኔና ታ ዱናፔ ኬዚዛ ማሻ ሚሳቲዛ ቃላራ አላና።

17 “አያናይ ዎሳ ኬሳታስ ጊዛይሳ ሃይሲ ዲዛዴይ ሲዮ!
የኒዳዴስ ታ ቆታን ዲዛ ማናፌ ኢማና። ኢዚ ታስ ጊዲዳይሳ
ቤሳናስ ኢዛ ቦላ አራሳ ሱንሳ ፃፌቲዳ ቦላ ሹቾ ኢዛስ ታ ኢማና።
ሄሳካ ኤኪዳዴፌ አቲን ሃራ አሲ አኒካ ኤሬና። *

ቲያሂሮኔ ዎሳ ኬሳ

* 2:8 ኢሳ 44:6፤ 48:12፤ አጁ 1:17፤ 22:13 * 2:11 አጁ 20:14፤
21:8 * 2:14 ታይ 22:5፤7፤ 31:16፤ ዛሬ 23:4፤ ታይ 25:1-3 * 2:17
ኬሳ 16:14-15፤ 16:33-34፤ ዮሃ 6:48-50፤ ኢሳ 62:2፤ 65:15

18 “**ቲያሊሮኔ** ዎሳ ኬሳ ኪታንቻስ ሂዝጋ ፃፋ ሃይሲ ታማ ላጮ ሚሳቲዛ አይፌቲ ዲዛዴፌኔ ቦንቁዳ ታማን ጌሊ ቆዩቲ ኬዚዳ ፃርቁማላ ሚሳቲዛ ቶሆቲ ዲዛዴፌ ዎሳ ናፔ ኪቴቲዳዛ። 19 ታኒ ኔ አሶኔ ኔ ሲቆ፥ ኔ አማኖኔ ኔ ሃጋዞ፥ ኔ ዳንዳያን ሚኖይሳካ ኤራይስ። ካሴ አሶዛፔ ጉዬይሲ አዲዛይሳካ ታ ኤራይስ። 20 ጊዶ አቲን ታ ኔና ካዲዛ ሚሺ ዴስ። ሄሲካ ባና ‘ታ ናቤ’ ጊዛ ማጫሳዮ ኤሊዛቤሎ ኔኒ ቤሳ አጊዳ ጊሽ ኢዛ ታስ አሲዛይቲ ላይማ ላይማታና ማላኔ ኤቃስ ያርሼቲዳ ካስ ማና ማላ ኢዛ ታማርሳዳ ባሌሳዱስ። * 21 ኢዛ ማሮቴሳን ጌላና ማላ ታ ኢዚስ ዎዴ ኢማዲስሂን፥ ኢዛ ቃስ ባ ላይማቴሳፌ ሲማናስ ኮያቤይኩ። 22 ሄሳ ጊሽ ታ ኢዞ ዋዬ አልጋ ቦላ ዬጋና። ኢዚራ አሲዳ አሳቲ ባ ኢታ አሶፔ ማሮቴሳን ሲሞንታ ኢዲኮ ኢዚራ ኢሲፌ ላይማቲዳ ኡባታ ቦላ ጊታ ሚቶ ታ ኤሃና። 23 ታኒ ኢዚ ናይታ ሃይቆን ቃዓያና። ዎሳ ኬሳቲ ዉሪካ አሳ ቆፋኔ አሳ አሞ ሻካ ኤሪዛይ ታና ጊዲዳይሳ ኤራና። ታኒ ኢንቴስ ኢሳስ ኢሳስ ኢዛዴ አሶ ማላ ኢማና።

24 “**ቲያሊሮኔን** ዲዛይታስ ኢንቴሲኔ ሃይሳ ኢታ ቲሚርቴ ታማሮንታይታስ ኡባስ ሄሳሶካ ኢሲ ኢሲ ‘ዓላዔስ ሃይሲ ጨማ ፀራ’ ጌቴቲዛይሳ ካሎንታይታ ኢንቴና ታኒ ሃራ ቶሆ ቶሲኬ። 25 ጊዲኮካ ታ ሄ ባና ጋካናስ ኢንቴስ ዲዛዝ ዉርሲ ሚንሲ አይኪቴ። 26 ዶንዳዴሲኔ ታ አሶን ዉርሴል ጋካናስ ሚኒዛይስ አይዛቤታ ቦላ ታ ጎዳቴል ኢማና። 27 ኢዚ ኢስታ ቢራታ ጉፌራ ሃራና፥ ኡርቃፌ ሜዴቲዳ ሚሻ ማላ ኢዚ ቡኪዲ ሲቁሳና። ሄሲ ሄ ጎዳቴሳይካ ታኒ ታ አሞፔ ኤኮ ጎዳቴሳ ማላ። 28 ታ ኢዛስ ዎንታ ቦላ ኬዚዛ ያሊንቴዛ ኢማና። 29 አያናይ ዎሳ ኬሳታስ ጊዛይሳ ሃይሲ ዲዛይ ዉሪ ሲዮ!” ጋዳ ፃፋ ጊዴስ።

3

ሳርዴሴ ዎሳ ኬሳ

1 ሳርዴሴ ዎሳ ኬሳ ኪታንቻስ፥ “ሃይሲ ያሳ አያና ላፑናታፔኔ ያሊንቴታ አይኪዳዴፌ ዮቴቲዳዛ። ታ ኔ አሶ ኤራይስ። ኔኒ ሱንሳን ጋዓ ዳሳ ሺን ቃስ ሃይቃዳሳ። 2 ቤጋ! ሃይቃና ማቲዳይሳኔ ኔስ ዉራሼ ጉል አቲዳ ዎልቃዮ ዛራ ሚንሳ። ታኒ ታ ጎዳ ሲንሳን ኔ አሶይ ኩሜል ጊዲን ቤያቤኬ። 3 ሄሳ ጊሽ ኔኒ አይ ማላ ቲሚርቴ ኤኪዳኮኔ ኔ ሲዮይሳ ዩሻ ቆጋኔ ናጋ። ማሮቴሳንካ ጌላ፤ ኔኒ ቤጎንታ አጊኮ ቃስ ታ ካይሶ ማላ ኔ ቆጋንታ ፑቱ ጋና። ታ አይ

* 2:20 1ካዎ 16:31፤ 2ካዎ 9:22፥30

ሳቴን ኔኮ ያናኮኔ ኔ ኤራካ። * 4 ጊዶ አቲን ባ ማይዎ ቱኒሶንታይቲ ሳርዴቤን ጉሳ አሳቲ ኔናራ ዴቲስ። ሄይቲ ቦሳ ማይዎ ማይዳናይሲ ኢስታስ ቤሲዛ ጊሽ ኢስቲ ቦሳ ማይዎ ማይዳዲ ታናራ ባና።
 5 ዎኒዳዴይ ኢስታሶካ ቦሳ ማይዎ ማይዳና። ኢዛዴ ሱንሳ ታኒ ታ አዋ ሲንሳኒ ኪታንቻታ ሲንሳን ኤሪሳና። ዴዎን ዲዛይታ ሱንሳ ፃፌቲዳ ዴዎ ማዘጋባፔ ቁጨኪ። *

6 “አያናይ ዎሳ ኬሳታስ ጊዛይሳ ሃይሲ ዲዛዴይ ሲዮ!

ፊላዴልፊያ ዎሳ ኬሳ

7 ፊላዴልፊያ ዎሳ ኬሳ ኪታንቻስ “ሃይሲ ጊሺኔ ቱማንቻ ጊዲዳይሳፌ ዳዉቲ ኬሳ ቁልፔ አይኪዳይሳፌ ዮቴቲዳይሳ። ኢዚ ዶዩዳይሳ አኒካ ጎርዴና። ኢዚ ጎርዲዳዝ አኒካ ዶዩና። * 8 ታኒ ኔ አሶ ኤራይስ፤ ሄኮ አኒካ ጎርዳናስ ዳንዳዮንታ ዶዮ ፔንጌ ኔ ሲንሳን ዎሳዲስ፤ ኔ ዎልቃይ ጉስ ጊዲዳይሳ ታ ኤራይስ፤ ጊዲኮካ ኔ ታ ቃላ ናጋዳሳ፤ ታ ሱንሳካ ኔ ካዳቤይካ። 9 ሄሳ ጊሽ ባስ አይሁዳ ጊዶንታ ዲሼ ባና አይሁዳ ጊዛይቲ ሄይቲ ፃላዔ ማባራፔ ጊዲዳ ዎርዶቲ ዩዲ ኔ ቶዎ ቦሳ ኩንዳና ማላ ታ አሳና። ታኒ ኔና ሲቁዳይሳ ኢስቲ ኤራና ማላ ታ አሳና። 10 ኔኒ ዳንዳዩዛዴ ጊዳ ጋዳ ታ ኔስ ዮቶ ቃላ ኔ ናጊዳ ጊሽ ታካ ቡሮ ቢታ ቦሳ ዲዛ አሳ ፓጫናስ ኩሜሳ አላሜ ቦሳ ያና ዋዩዛ ጋሳሳፌ ታ ኔና ናጋና።
 11 ሄኮ ታ ኤሶን ያና። ኔ አክሊሌ አኒካ ኤኮንታ ማላ ኔስ ዲዛዝ ሎዔሳ አይካ። 12 ዎኒዳዴ ታኒ ታ ጎዳ ዎሳ ኬሳን ቱስ አሳና። ኢዚ ሄፔ ሙሌካ ኬዜና። ታ ጎዳ ሱንሳኔ ታ ጎዳ ካታማዛ ሱንሳካ ታ ኢዛ ቦሳ ፃፋና። ሃና ካታማያ ሳሎፔ ታ ጎዳ አቻፌ ዎዳና አራሳ ዩሩሳላሜ። ታካ ታ አራሳ ሱንሳ ሄ ኢዛዴ ቦሳ ፃፋና። *

13 አያናይ ዎሳ ኬሳታስ ዮቴዛይሳ ሃይሳ ዲዛዴይ ሲዮ!

ሎዶቂያ ዎሳ ኬሳ

14 “ሎዶቂያ ዎሳ ኬሳ ኪታንቻስ ‘ሃይሲ አሚን’ ጊዳይሳፌ ቱሙ አማኔቲዳ ማርካ ጊዲዳዴፌ ዎሳ ሜዴቴሲ ዉሪ ኢዛፔ ቤቲዳዴፌ ዮቴቲዳዛ። * 15 ታኒ ኔ አሶ ኤራይስ። ኔኒ ኢርፃ ዎይኮ ሚሻ ጊዳካ። ኔኒ ኢርፃ ዎይኮ ሚሻ ጊዲዳኮ ሎዎኮሺን።
 16 ኢርፃ ዎይኮ ሚሻ ጊዶንታ ኔ ጮ ዶንቦላ ጊዲዳ ጊሽ ታ ኔና ታ ዱናፔ ኬሳ ጩታና ጋይስ። 17 ‘ታ ዱሬኮ፤ ታስ ዳሮ ሃሮይ ዴስ፤ ታስ አይኮይካ ፓጨቤና’ ጋሳ ሺን ኔ ቃስ ጊልቃ፤ አይኮይ ባይንዳ ሂዮሳ፤ ማንቆ፤ ቆቁኔ ኔ ካሎ ዲዛዴ ጊዲዳይሳ ኤራቤካ።

* 3:3 ማቶ 24:43-44፤ ሉቃ 12:39-40፤ አጃ. 16:15 * 3:5 ኬሳ 32:32-33፤ ማዛ 69:28፤ አጃ. 20:12፤ ማቶ 10:32፤ ሉቃ 12:8 * 3:7 ኢሳ 22:22፤ ኢዮ 12:14 * 3:12 አጃ. 21:2፤ ኢሳ 62:2፤ 65:15 * 3:14 ሌዎ 8:22

18 ኔ ዱሬ ጊዳና ኮይኮ ታፔ ታማን ፓጨቲዳ ዎርቃ ሻማና ማላ ኔኒ ኔ ካሎቴሳ ዩላቴሳ ካማናስ ቦሳ ማይዎ ማይዳና ማላኔ ግላናስካ ዳንዳያና ማላ አይፌ ዳሌ ሻማዳ ኔ ቲዩታና ማላ ታ ኔና ዞራይስ። 19 ታኒ ታ ዶሲዛይታ ዉርሳ ሃንቃይሲኔ ቃፃያይስ፤ ሄሳ ጊሽ ኔኒ ሚና፤ ማሮቴሳንካ ጌላ። * 20 ሄኮ! ታኒ ፔንጌን ኤቃዳ ግይጋይስ፤ አኒካ ታ ቃላ ሲይዲ ባ ፔንጌዛ ታስ ዶዩኮ ታ ኢዛኮ ጌላዳ ኢዛዴራ ማና። ኢዛዴይካ ታናራ ማና። 21 ታኒ ያናዳ ታ አዋራ ኢዛ አልጋን ኡቲዳይሳሶ ያኒዳዴይ ታናራ ኢሲፌ ታ አልጋ ቦላ ታ ኡቲሳና።

22 “አያናይ ዎሳ ኬሳታስ ጊዛይሳ ሃይስ ዲዛይ ሲዮ!” ጋ 9ፋ ጊዴስ።

4

ሳሎን ዲዛ ጎይኖ ዎጋ

1 ሄሳፍ ጉዬ ታኒ ሳሎን ዶያ ዲዛ ፔንጌ ቤያዲስ። ታኒ ኮይሮ ሲዩዳይ ዲንኬ ጊሪሳ ማላ ጊሪስ “ሃ ፑዴ ኬዛ፣ ቡሮፔ ሃናና ሚሻታ ታ ኔና ቤሳና” ጊዴስ። 2 ታኒ ሄራካ አያናን ሊጲጲ ጋዳ ሳሎን ዲዛ አልጋ ቤያዲስ። ሄ አልጋዛ ቦላካ ኢሳዴይ ኡቲዴስ። 3 ሄ አልጋ ቦላ ኡቲዳይሳ ሜዳይ ኢያሲጲዴይ ሴርዲኖኔ ኢንቁ ሚሳቲዛ አልጋዛ ዩዩ አዲዲ ማርጊዴ ጌቲቲዛ ኢንቁ ሚሳቲዛ ዙላይ ዴስ። 4 ሄሳሶካ ሄ አልጋዛ ዩዩ አዲዳ ናምዑ ታማኔ አይዱ አልጋቲ ዴቲስ። ሄ አልጋታ ቦላ ቃስ ቦሳ ማይዎ ማይዲዲ ባ ሁዔ ቦላ ዎርቃ አክሊሌ ዎሲዳ ናምዑ ታማኔ አይዱ ጪማቲ ኡቲዳ። 5 ሄ አልጋፌ ቃስ ዎልቃንሊኔ ዳዳ ጊሪስ ኬዜስ። ሄ አልጋ ሲንሳን ፖዲዛ ላፑን ያምፔቲ ዴቲስ። ሄይቲካ ያሳ አያና ላፑናታ። * 6 ሄ አልጋ ሲንሳን ጌሽ ሚልፂ ጊዳ ያልቁዛ ማስቶቲ ሚሳቲዛ አባይ ዴስ። ኢዛ ጊዶን አልጋ ዩሾን ዳሮ አይፌራ ዲዛ አይዱ ዶዓቲ ዴቲስ። 7 ኮይሮ ዶዓዚ ጋሞ ሚሳቲስ። ናምዓንሶዚ ቃስ ቦራ ሚሳቲስ። ሄዳንሶዛ አይፌሶይ አሳ አይፌሶ ሚሳቲስ። አይዳንሶዚ ቃስ ፒራዲዛ ጎሌ ካፎ ሚሳቲስ። 8 ሄ አይዱ ዶዓቲ ኢሶይ ኢሶይ ኡሱፑን ቁፌራ ዴቲስ። ቁፌታ ዩሾኒኔ ቁፌታ ጊዶን አይፌይ ኩሚዴስ። ኢስቲ ቃማኔ ጋላስ፣ “ጌሻዉ! ጌሻዉ! ጌሻዉ! ዉርሳ ዳንዳይዛ ጎዶ! ካሴካ ሃሂካ ዲዛይሶ፣ ቡሮካ ያናይሶ ጉሳፌ ሼምፒ ኤሬቴና። * ”

* 3:19 ሌም 3:12፤ ኢብ 12:6 * 4:5 ኬሳ 19:16፤ አጃ. 8:5፤ 11:19፤ 16:18፤ ሂዚ 1:13፤ አጃ. 1:4፤ ዛካ 4:2 * 4:8 ሂዚ 1:18፤ 10:12፤ ኢሳ 6:2-3

9 ሃ ዶዓቲ ሄ አልጋ በላ ኡቲዳይሳሰኔ ሜርናፕ ሜርና ጋካናስ ዲዛይሳስ ጊታቴስ፤ በንቾኔ ጋላታካ ሺሺዛ ዎዴ ኡባን፤ 10 ናምዑ ታማኔ አይዱ ጨማቲ ሜርናፕ ሜርና ጋካናስ ዲዛ ባ አልጋ በላ ኡቲዳይሳ ሲንሳን ጉፓኒዲ ኢዛስ ጎይኔቴስ። ባ አክሊሌታካ ሄ አልጋ ሲንሳን ዎሲዲ፤

11 “ኑ ጎዳ ዎሶ፤

ኔኒ ዉርሳ ሜዲዳ ጊሽ

ሜዴቴሲ ዉሪካ

ሜዴቴዳይኔ

ሼምፖራ ዲዛይ ኔ ሼኔን ጊዲዳ ጊሽ

ጊታቴሲ፤ በንቾይኔ ዎልቃይካ ኔስ ቤሴስ” ጊዳ።

5

ዶርሳዛኔ ኢዛ ማፃፋ

1 ሄ አልጋ በላ ኡቲዳይሳ ኡሻቻ ኩሼ ቃዓ ጋርሳኒኔ በላ ባጋራ ፃፌቲ ኡቲዳ ላፑን ማታሜን ጎርዴቲዳ ኢሲ ፃፂቲ ኡቲዳ ማፃፋ ቤያዲስ። 2 ኢሲ ሚኖ ኪታንቻ ዳይሲ ጊታ ቃላራ “ሃይታ ማታሜታ ቢርሺዲ ሃ ፃሳ ማፃፋ ዶያናስ ቤሲዛዴይ አኔ?” ጊ ሃሳዬሺን ታ ቤያዲስ። 3 ጊዶ አቲን ሳሎንካ ጊዲን ዎይኮ ሳዓ በላ ዎይኮ ቤታፌ ጋርሳ ባጋንካ ሄ ፃሳ ማፃፋ ዶዶዲ ኢዛ ጊዶን ዲዛይሳ ፂላናስ ዳንዳዶዳ አሲ አኒካ ቤቲቤና።

4 ታካ ሄ ፃሳ ማፃፋ ቢርሺዲ ኢዛ ጊዶ ፂላናስ ቤሲዛዴይ ቤቶንታ አጊዳ ጊሽ ዳሮ ዩካዲስ። 5 ሄ ዎዴ ጨማታፕ ኢሳዴይ ታስ “ኔ ዩኮፋ! ሄኮ ዩሁዳ ባጋ ጊዲዳ ዳዉቴ ዛርኬፌ ዴንዲዳ ጋሞይ ኢዚ ካሴ ያኒዴስ። ኢዚ ሄ ፃሳ ማፃፋዛኔ ሄ ላፑን ማታሜዛ ዶያናስ ዳንዳዩስ” ጊዴስ። *

6 ሄሳፌ ጉዩ አልጋ በላን አይዱ ዶዓታ ጊዶን ሄ ጨማታ ጊዶንካ ሹኪቲዳ ዶርሳ ሚሳቲዛይሲ ኤቂዳይሳ ታ ቤያዲስ። ሄ ዶርሳዛስ ላፑን ካጨዩይ ላፑን አይፌይ ዴስ። ሄ አይፌቲካ ኩሜሳ አላሜ ኪቴቲዳ ዎሳ አያና ላፑናታ። * 7 ሄ ዶርሳይ ዩዲኔ አልጋ በላ ኡቲዳይሳፌ፤ ኡሻቻ ኩሼን ዲዛ ፃሳ ማፃፋ ኤኪዴስ። 8 ሄ ፃሳ ማፃፋዛ ኤኪዳ ማላ አይዱ ዶዓቲኔ ናምዑ ታማኔ አይዱ ጨማቲ ሄ ዶርሳ ሲንሳን ባ ሊጶን ጉፓኒዳ። ኢስቲካ ኢሶይ ኢሶይ ባ ኩሼን ዲሳ ማላ ሚሽ አይኪዴስ። ሄሳሶካ ጊሻታ ዎሳ ጊዲዳ ኢዛን ኤፃኔይ ኩሚዳ ዎርቃ ፃሮ ባ ኩሼን አይኪ ዴቴስ። * 9 አራሳ ዩስ ሂዝጊ ዩዲዳ

* 5:5 ሜዴ 49:9፤ ኢሳ 11:1፤ 10 * 5:6 ኢሳ 53:7፤ ዛካ 4:10 * 5:8 ማዛ 141:2

“ኔኒ አሳ ዱማ ዱማ ኮቻፌ፥
 ዱማ ዱማ ቃላን ሃሳዪዛይታፕ፥
 ዱማ ዱማ ቆሞፌኔ
 ዱማ ዱማ ዴሬፕ

ጦሳስ ምዛናስ ኔ ሹኬቲዳ ጊሽ ሄ ፃላ ማፃፋዛ ኤካናሲኔ ማታሜታካ
 ዶያናስ ቤሲዛዴ ጊዳዳሳ። *

10 ኔ ኢስታ ኑ ጎዳ ጦሳስ
 ካዎታኔ ቁሴታ አሳዳሳ።
 ኢስቲካ ቢታ ቦላ ካዎታና።” *

11 ታኒ ጌዴ ዛራ ዪሊሺን ሄ አልጋዛ፥ ዶዓታኔ ጨማታ ዩዩ
 አዲዳ ዳሮ ኪታንቻታ ቃላ ጊሪስ ሲያዲስ። ኢስታስ ጮራቴሳይ
 ዳሮ ሺያኒኔ ዳሮ ሚሎኔን ቆዴቴስ። * 12 ኢስቲ ዳሮ ጊታ ቃላን
 “ሃ ሹኬቲዳ ዶርሳይ ምልቃ፥ ዱሬቴስ፥ ኤራቴስ፥ ሚኖቴስ፥
 ጊታቴስ፥ ቦንቾኔ ጋላታ ኤካናስ ቤሴስ” ጊዳ።

13 ሳሎንካ ሳዓ ቦላካ፥ ቢታፌ ጋርሳንካ፥ አባ ጊዶን ዲዛ
 ሜዴቴሳ ኡባን “አልጋ ቦላ ኡቲዳይሳሲኔ ዶርሳስ ጋላታይኔ
 ዶቃቴሳ፥ ቦንቾይኔ ምልቃይ ሜርናፕ ሜርና ጋካናስ ኢዛስ
 ጊዶ!” ጊሺን ታ ሲያዲስ። 14 አይዱ ዶዓቲካ “አሚን” ጊዳ።
 ጨማቲካ ባ ሊዴን ጉፋኒዲ ኢዛስ ጎይኒዳ።

6

ላፑን ማታሜታ ዶዩቴስ

1 ሄሳፌ ጉዩካ ሄ ዶርሳይ ላፑን ማታሜታፕ ኮይሮ ማታሜዛ
 ዶዩሺን ታ ቤያዲስ። ሄ አይዱ ዶዓታፕ ኢሶይ ዳዳ ጉጉንሳ ማላ
 ቃላራ “ሃ ያ!” ጊሺን ሲያዲስ። 2 ቃሴካ ቦላ ፓራ ቤያዲስ።
 ሄ ፓራዛ ቦላ ባ ኩሼን ምንዳፌ አይኪዳዴይ ዴስ። ኢዛስ ቃስ
 አክሊሌይካ ኢሜቲዴስ። ኢዚካ ሶኒዛዴ ጊዲዲ ሶኖፕ ጌዴ ሶኖን
 ባናስ ኬዚዴስ። *

3 ሄ ዶርሳይ ናምዓንሶ ማታሜዛ ዶይዳ ማላ ናምዓንሶ ዶዛዚ
 “ሃ ያ!” ጊሺን ታ ሲያዲስ። 4 ቃሴካ ሃራ ዪቃ ዞዎ ፓራይ
 ኬዚዴስ። ሄ ፓራ ቶጊዳዴይ ቢታ ቦላፌ ሳሮቴስ ዳይሳና ማላኔ
 አሳይ ባ ጋርሳን ኢሶይ ኢሳ ዉርሳና ማላ አሲሳናስ ኢዛስ ጎዳቴሳኔ
 ምጋ ጊታ ማሻይ ኢሜቲዴስ። *

5 ዶርሳዚ ሄሻንሶ ማታሜዛ ዶዩን ሄሻንሶ ዶዛዚ “ሃ ያ!”
 ጊሺን ታ ሲያዲስ። ቃሴ ካሬሳ ፓራ ቤያዲስ። ሄ ፓራ ቦላ

* 5:9 ማዛ 33:3፤ 98:1፤ ኢሳ 42:10 * 5:10 ኬሳ 19:6፤ አጃ 1:6
 * 5:11 ዳኔ 7:10 * 6:2 ዛካ 1:7-8፤ 6:3፥6 * 6:4 ዛካ 1:7-8፤ 6:2

ኡቲዳይሲ ባ ኩሼን ማካ ሚሽ አይኪዴስ። * 6 አይዱ ደግታ ጊዶፌ ዩዳ ሚሳቲዛ ቃላ ሲያዲስ፤ ሄ ጊሪሳይካ “ባጋ ኪሎ ጊዲዛ ጊስቱ ኢሳዴስ ኢሲ ጋላሳ ዳሞዛ፤ ቃሴ ኢሲ ኪሎ ኩማና ሳይሶ ፓጩ። ጊዲዛ ባንጋይ ኢሲ ጋላሳ ዳሞዛ ጊዶ። ጊዶ አቲን ዛይቱኔ ዎይኔ ሚሳ ቆሆፓ” ጊሺን ታ ሲያዲስ።

7 ሄ ዶርሳይ አይዳንሶ ማታሜዛ ዶዩን አይዳንሶ ደግዛ ቃላይ “ሃ ያ!” ጊሺን ሲያዲስ። 8 ቃሴካ ጮሎሎ ፓራ ቤያዲስ። ፓራ ቶጊዳይሳ ሱንሲ ሃይቆ ጌቱቱስ። ኢዛ ቃስ ዱፎይ ካሌስ። ሃይቆይኔ ዱፎይ ቤታፌ ሳይሶ አላን፣ ጋፋን፣ ቦሻኒኔ ባዞ ዶግን ዎዳና ማላ ጎዳቱሊ ኢስታስ ኢሜቲዴስ። *

9 ኢቻሻንሶ ማታሜዛ ኢዚ ዶዩን ያሳ ቃላ ጊሺኔ ባ ማርካቲዳ ማርካቲሳ ጊሽ ሃይቂዳይታ ሼምፓታ ያርሾ ያርሼዛሰዛ ጋርሳን ቤያዲስ። 10 ኢስቲ ቃስ ቃላ ጶቁ ሂስቲዲ “ጊሻኔ ቱማንቻ ጎዳዉ! ኔኒ ቤታ ቦላ ዲዛ አሳ ቦላ ፐርዶንታይኔ ኑ ሱሳ ጊሽ ኔ ሃሎ ኬሶንታይ አይዴ ጋካናሴ?” ጊዲ ዋሲዳ። 11 ኢስታስ ኢሳስ ኢሳስ ቦላ ማይዎይ ኢሜቲዴስ። ኢስታ ማላቲካ ቡሮ ሃይቃና። ኢስታ ማላ አላንቻ ጊዲዳ ኢስታ ላጌቲኔ ኢስታ ኢሻታ ቆዳይ ኩማና ጋካናስ ኢስቲ ጉሳ ዎዴስ ሼምፐዲ ታካና ማላ ኢስታስ ሶቴቲዴስ።

12 ሄሳፌ ጉዬ ሄ ዶርሳይ ኡሱፑንሶ ማታሜዛ ዶዩን ታኒ ጌዴ ኢዛኮ ዩላዲስ፤ ሄኮ ቤታይ ዎልቃማ ቃስ ቃዲዴስ። አዎ አርሼይ አሲ ካዮስ ማይዲዛ ካሬሳ ማይዎ ማላ ካሬዲዴስ። አጊናይካ ኩሜሳራ ሱሳ ማላ ዞግዱስ። * 13 ዎልቃማ አሱራ ጫርኮይ ጫርኪዲ ሚሳ አይፌ ቆቆፊዛ ማላ ሳሎፔ ያሊንቲይ ቆቆፊቲዴስ። * 14 ሳሎይካ ዋራቃታ ማላ ፃዌቲዲ ኪቺዴስ። ዙማቲኔ አባ ጊዶን ዲዛ ጋዴቲ ዉሪካ ባ ዲዛሶፔ ዳዩቺዳ። * 15 ቤታ ቦላ ዲዛ ካዎቲ ቤታ ሃሪዛይቲ፣ አላ ሃላቃቲ፣ ዱሬቲ፣ ዎልቃማቲ፣ አሽካራቲኔ ጎዳቲ ዉሪካ ጎንጎሎ ጊዶኒኔ ዙማታ ጋርሳን ዛላታ ጋርሳን ቆቱቲዳ። * 16 ዙማታኔ ዛላታካ “ኑና ካሚቲ! አልጋ ቦላ ኡቲዳይሳ ሲንሳፌ፣ ሄ ዶርሳዛ ሃንቆፌ ኑና ቆቲቱ። * 17 ዎልቃማ ሃንቆ ጋላሳይ ጋኪዴስ። ኢዛ አኔ ዳንዳያናይ?” ጊዳ። *

* 6:5 ዛካ 6:2፣6 * 6:8 ሂዚ 14:21 * 6:12 አጁ 11:13፣ 16:18፣ ኢሳ 13:10፣ ኢዩ 2:10፣31፣ 3:15፣ ማቶ 24:29፣ ማር 13:24-25፣ ሉቃ 21:25 * 6:13 ኢሳ 34:4 * 6:14 አጁ 16:20 * 6:15 ኢሳ 2:19፣21 * 6:16 ሆሴ 10:8፣ ሉቃ 23:30 * 6:17 ኢዩ 2:11፣ ሚላ 3:2

7

፪ታኔ አይዱ ታማኔ አይዱ ሺ አሳ አታሜቴሰ

1 ሄሳፌ ጉዬ አይዱ ኪታንቻታ ቢታ ቦላ አይዱ ባጋራ ኤቂዳይታ ቤያዲስ። ኢስቲካ ቢታ ቦላ ጊዲን ዎይኮ አባ ቦላ ዎይኮ ሚሳ ቦላ አይ ጫርኮይካ ጫርኮንታ ማላ አይዱ ባጋራ ዪዛ ቦሻ ጫርኮ ዉርሲ አይኪዳ። * 2 ዴዎ ዎሳ ማታማ አይኪዳ ሃራ ኪታንቻይ አዋ አርሼይ ሞኪዛ ባጋራ ሃ ዪሺን ታ ቤያዲስ። ቢታኔ አባ ቆሃናስ ኢስታስ ጎዳቴሰ ኢሜቲዳ አይዱ ኪታንቻታ ባ ቃላ ዶቁ ሂስቲዲ። 3 “ኑኒ ኑ ጎዳ አሳንቻታ ሊጴ ቦላ ማታሜ ዎላና ጋካናስ ቢታ ቦላ ጊዲን ዎይኮ አባ ጊዶን ዲዛይታ ጊዲን ዎይኮ ሚሳታ ጊዲንካ ሄይታንታ ቆሆፒቴ” ጊ ዋሲዴስ። *

4 ታካ ማታሜይ ኢስታ ቦላ ዎዲዳይታ ቆዳ ሲያዲስ። ኢስራዔል አሳ ኮቻ ኡባፌ ማታሜይ ኢስታ ቦላ ሾጩቲዳይታ ቆዳይ ፪ታኔ አይዱ ታማኔ አይዱ ሺ አሳ። 5 ዩሁዳ ቆሞፌ ማታሜይ ኢስታ ቦላ ሾጩቲዳይቲ። ታማኔ ናምዑ ሺ።

ሮቤሌ ቆሞፌ ታማኔ ናምዑ ሺ።

ጋዴ ቆሞፌ ታማኔ ናምዑ ሺ።

6 አሴሬ ቆሞፌ ታማኔ ናምዑ ሺ።

ኒፍታሌሜ ቆሞፌ ታማኔ ናምዑ ሺ።

ሚናሴ ቆሞፌ ታማኔ ናምዑ ሺ።

7 ሲሞና ቆሞፌ ታማኔ ናምዑ ሺ።

ሌዌ ቆሞፌ ታማኔ ናምዑ ሺ።

ዩሳኮሬ ቆሞፌ ታማኔ ናምዑ ሺ።

8 ዛቢሎኔ ቆሞፌ ታማኔ ናምዑ ሺ።

ዮሴፌ ቆሞፌ ታማኔ ናምዑ ሺ።

ቢኒያሜ ቆሞፌ ታማኔ ናምዑ ሺ።

ቦላ ማይዎ ማይዲዳ ዳሮ ዴሬ

9 ሄሳፌ ጉዬ ታ ፪ሊሺን ቆዳይ ባይንዳ ዳሮ ዴሬይ ዲዛይሳ ቤያዲስ። ሄይታንቲካ ዴሬፔ። ዱማ ዱማ ቆሞፌ። ዱማ ዱማ ዛርኬሬኔ ዱማ ዱማ ቃላ ሃሳዩዛይታፔ ሺቁቲዳይታ። ሄይቲ ዉሪ ቦላ ማይዎ ማይዲዲ ዛምባ ሃይስ ባ ኩሼን አይኪዲ አልጋ ሲንሳኒኔ ዶርሳዛ ሲንሳን ኤቂዳ። 10 ቃላ ዶቁ ሂስቲዲ “አቶቴሰ አልጋ ቦላ ኡቲዳ ኑ ጎዳፔኔ ዶርሳዛፔኮ!” ጊዳ።

11 ኢዛ ኪታንቻቲ ዉሪካ ኢዛ አልጋስ። ጨማታኔ አይዱ ዶዳታ ዩይ አዲ ኤቂዳ አልጋዛ ሲንሳን ጉፋኒዲ ዎሳስ ጎይኒዳ።

12 “አሚን! ሳባይ። ጊታቴሰ።

* 7:1 ኤር 49:36፣ ዳኔ 7:2፣ ዛካ 6:5 * 7:3 ሂዘ 9:4-6

ኤራቴሲ፣ ጋላታይ፣ በንቾይ፣
ዎልቃይኔ ሚኖቴሲ ኑ ጎዳስ ሦሳስ

ሜርናፔ ሜርናስ ጊዶ። አሚን!” ጊዳ።

13 ጨማታ ጊዶሬ ኢሳዴይ ታኮ ሲሚዲ ታና “ሃይቲ በሳ ማይዎ ማይዲዳይቲ አናንቴ? ኢስቲ አዋፔ ዩዳይቴ?” ጊዴስ።

14 ታካ “ጎዳዉ! ኔ ኤራሳ” ጋዲስ። ኢዚካ ታስ “ሃይቲ ዎልቃማ ዋዬዛ ካንሲዲ ዩዳይታ። ኢስቲ ባ ማዮካ ዶርሳ ሱላን ሜጪ ጌሺዳ። * 15 ሄሳ ጊሽ ሦሳ አልጋ ሲንሳን ዴዲዲ ቃማኔ ጋላስ ኢዛ ኬላን ኢዛስ አሴቴስ። አልጋ በላ ኡቲዳይሲ ባ በንቾራ ቤቲዲ ኢስታስ ኩዋሶ ጊዳና። 16 ሃይሳፌ ጉዬ ኢስቲ ጋፌቴና፣ ሳሞቴቴና፣ አዋ አርሼ ሲላይካ ኢስታ ቦቼናኔ ሆምቤይካ ኢስታ ሆምቤና። * 17 አልጋዛስ ጊዶ አዳን ኡቲዳ ዶርሳይ ኢስታ ሄሚዛዴ ጊዳና። ኢስታካ ጌዴ ዴዎ ሃሳ ፑልቶይ ዲዛሶ ካሌሳና። ሦሲ ኢስታ አይፌፔ አፉንሳ ቁጫና” ጊዴስ። *

8

ላፑንሳ ማታሜ ዶዬቴስ

1 ዶርሳይ ላፑንሳ ማታሜዛ ዶዬን ባጋ ሳቴ ጊዲዛይሳ ኬና ሳሎይ ጮው ጊዴስ። 2 ሦሳ ሲንሳን ኤቁዛ ላፑን ኪታንቻታ ታኒ ቤዎዲስ። ሄ አሳታስካ ላፑን ዲንኬይ ኢሜቲዴስ።

3 ኤፃኔ ኢዛን ጩዋሲዛ ዎርቃፍ አሴቲዳይሳ አይኪዳ ኪታንቻይ ዩዲ ያርሾ ኢዛን ያርሺዛሶዛ አቻን ኤቁዴስ። አልጋ ሲንሳን ዲዛ ዎርቃፌ አሴቲዳ ያርሾ ኢዛ በላ ያርሺዛይሳ በላ ጌሻታ ዎሳራ ኢሲፌ ሸሺዛ ዳሮ ኤፃኔይ ኢዛስ ኢሜቲዴስ። * 4 ሄ ኤፃኔዛ ጩዋይ ሦሳስ ዱማቲዳ አሳታ ዎሳስ ሄ ኪታንቻ ኩሼፔ ፑዴ ሦሳ ሲንሳ ኬዚዴስ። 5 ሄሳፌ ጉዬ ኪታንቻዚ ኤፃኔ ኢዛን ጩዋሲዛይሳ አይኪዲ ያርሾ ያርሺዛሶዛፔ ታማ ኤኪ ኢዛን ኩንሳዲ ዱጌ ቢታ በላ ዩጊዴስ። ዳዳይ ዳዳቲዴስ፤ ጊርሲ ጊርዴስ፤ ዎልቃንሳ ዎልቃሚዴስ፤ ቢታይካ ቃፂዴስ። *

ዛዬይ ፑኔቲዴስ

6 ላፑን ዛዬ አይኪዳ ላፑን ኪታንቻቲ ባ ዛዬ ፑናናስ ጊጌቲዳ።
7 ኮይሮ ኪታንቻዚ ባ ዛዬዛ ፑኒዴስ፤ ሻቺኔ ሱሴ ዋላኬቲዳ ታማይ ሜዴቲዲ ዱጌ ቢታ በላ ዩጌቲዴስ፤ ቢታፌ ጪሳይ

* 7:14 ዳኔ 12:1፤ ማቶ 24:21፤ ማር 13:19 * 7:16 ኢሳ 49:10
* 7:17 ማዛ 23:1፤ ሂዚ 34:23፤ ማዛ 23:2፤ ኢሳ 49:10፤ ኢሳ 25:8
* 8:3 አሞ 9:1፤ ኬሳ 30:1፣3 * 8:5 ሌዌ 16:12፤ ሂዚ 10:2፤ ኬሳ 19:16፤ አጃ 11:19፤ 16:18

ፀጌቲደስ፤ ሚሳፌካ ጨጎይ ፀጌቲደስ፤ ጨሊላ ማታይካ ወሪ ፀጌቲደስ። *

8 ናምግንሶ ኪታንቻይካ ባ ዛዩዛ ፑኒደስ፤ ኢሲ ጊታ ዙማ ሚሳቲዛ ሚሺ ኤዲሼ ዱጌ አባ ጊዶ ዩጌቲደስ፤ አባስ ጨጎይ ሱሉ ጊዲደስ። 9 አባ ጊዶን ሽምፖራ ዲዛ ሚዴቴላፌ ጨጎይ ወሪ ሃይቂደስ። ማርካቤታፕካ ጨጎይ ኩሚስ ጳዩደስ።

10 ሄቫንሶ ኪታንቻዚ ባ ዛዩዛ ፑኒደስ። ያምፔ ማላ ኤዲዛ ኢሲ ጊታ ያሊንቴይ ሳሎፔ ዱጌ ኩንዲደስ። ኢዚ ኩንዲዳይ ሻፋታ ጨጎ ቦላኔ ሃሳ ፑልቶታ ጨጎ ቦላ። * 11 ሄ ያሊንቴዛ ሱንሳይ ጫሞ ጌቴቴስ፤ ሃሳስ ጨጎይ ጫሞ ጊዲደስ፤ ሄ ጫሞ ሃሳ ጋሶን ዳሮ ደሬይ ሃይቂደስ። *

12 አይዳንሶ ኪታንቻይ ባ ዛዩዛ ፑኒደስ፤ አዋ አርሼስ ጨጎይ፥ አጊናስ ጨጎይ፥ ያሊንቴታስ ጨጎይ ሾጩቲደስ፤ ሄሳ ጊሽ ሄይታንታ ፖፖፔ ጨጎይ ዱሚደስ፤ ሄሳ ማላንካ ጋላሳፌ ጨጎይ አማርስ ጊዲደስ። ሄሳሶካ አማርሳፔ ጨጎይ ፖፖይ ባይንዳ ዱማ ጊዲደስ። *

13 ታ ቃስ ዛራ ያሊሺን ኢሲ ጎሌ ካፎይ ሳሎ ቦላ ፒራዲሽ ጊታ ቃላን “ሃንኮ አቲዳ ሄቩ ኪታንቻቲ ባ ዲንኬታ ጊሪስ ሲሲዛ ዎዴ ቢታ ቦላ ዲዛ አሳስ አዩ-አና! አዩ-አና! አዩ-አና!” ጊሺን ሲያዲስ።

9

1 ኢቻሻንሶ ኪታንቻይ ባ ዛዩዛ ፑኒደስ። ታ ቃስ ሳሎፔ ካሴ ዱጌ ቢታ ቦላ ኩንዲዳ ያሊንቴዛ ቤያዲስ። ኢዛስ ቃስ ጨማ አላ ዶዩዛ ቁልፔይ ኢሜቲደስ። 2 ኢዚካ ሄ ጨማ አላዛ ዶዩደስ። ሄ ጨማ አላፔ ዎልቃማ ታማ ጩዋ ማላ ጩዋይ ኬዚደስ። ሄ አላፌ ኬዚዳ ጩዋዛ ጌዶን አዋ አርሼይኔ ሳሎይ ዱሚደስ። *

3 ሄ ጩዋፔ ቢታ ቦላ ቦሌይ ኬዚደስ። ቢታ ቦላ ዲዛ ማስማሶታስ ዲዛ ዎልቃ ማላ ዎልቃይ ኢስታስ ኢሜቲደስ። *

4 ቢታ ቦላ ዲዛ ማታ ጊዲን ዎይኮ አይ ሚሺካ ሃራ ጨሊላ ሚሽ ሞንታ ማላ ዎይኮ አይ ሚሲካ ቆሆንታ ማላ ኢስታስ ዮቴቲደስ። ኢስቲ ቆሃና ቤሲዛይ ቃስ ሊዱ ቦላ ያሳ ማታሜይ ባይንዳ አሳታ ያላላ ጊዳና ማላ። * 5 ሄ ኢስታካ ኢቻሹ አጊና ጋካናስ ዋዩ ያላላ ዋዩሳና አቲን ዎዶ ዎዳና ማላ ፒቃዴይ ኢስታስ ኢሜቲቤና።

* 8:7 ኬሳ 9:23-25፤ ሂዚ 38:22 * 8:10 ኢሳ 14:12 * 8:11 ኤር 9:15 * 8:12 ኢሳ 13:10፤ ሂዚ 32:7፤ ኢዩ 2:10፤31፤ 3:15 * 9:2 ሜዴ 19:28 * 9:3 ኬሳ 10:12-15 * 9:4 ሂዚ 9:4

ሄ ቦሌቲ አሳ ቦላ ጋሲዛ ዋዩዚ ማሲማሶይ አስ ዱኪኮ አስ ሴሊዛ ሴላ ማላ። ⁶ ሄ ጋላሳታን አሳይ ሃይቃና ኮያና ሺን ሃይቆ ዴሚና። ሃይቃናስ አሞታና ሺን ሃይቆይ ኢስታፌ ባቃታና። *

⁷ ቦሌቲ ቃስ አላስ ጊጌቲዳ ፓራታ ሚሳቴስ፤ ኢስታስ ሁዔ ቦላ ዎርቃ አክሊሌ ሚሳቲዛ ሚሺ ዴስ። ኢስታ አይፌሶይ አሳ አይፌሶ ሚሳቴስ። * ⁸ ኢስታ ሁዔ ኢሲኬይ ማጫሳ ሁዔ ኢሲኬ ሚሳቴስ፤ ኢስታ አቼይ ቃስ ጋሞ አቼ ሚሳቴስ። * ⁹ ቢራታፔ አሴቲዳ ፀሩሬ ጌቴቲዛ ማይያ ማላ ቲራ ቦላ ማይዒዛ ማይያይ ኢስታስ ዴስ፤ ኢስታ ቄፌይ ጊሪዛ ጊሪሳይ አላስ ቶጌቲዛ ዳሮ ፓራኔ ፓራ-ጋሬታ ጊሪሳ ማላ ጊሬስ። * ¹⁰ ኢስታስ ማሲማሶ ጎይና ማላይይ ዱኪዛሶይ ዴስ። ኢስታስ ጎይና ጊዶን ኢቻሹ አጊና ጋካናስ አስ ቆሂዛ ዎልቃይ ዴስ። ¹¹ ካዎይካ ኢስታስ ዴስ። ሄ ኢዚካ ጩማ አላ ኪታንቻዛ። ኢዛ ሱንሳይካ ኢብራዌታ ዎላራ “አባዶኔ” ጌቴቲስ። ቃሴ ጊሪኬ ቃላራ “አጲሊዮኔ” ጌቴቲስ። ሄሳ ጉሲካ ፒቲ ዳይሲዛይሳ ጉሳ። *

¹² ኮይሮ ሂርጊሶ ዋሶይ አዲዴስ። ሄሳፌ ቃስ ሃራ ናምዑ ዋሶይ ቡሮ ያና።

¹³ ኡሱፑንሳ ኪታንቻይካ ባ ዛዩዛ ፑኒዴስ። ሄኮ! ያሳ ሲንሳን ዲዛ ዎርቃፌ አሴቲዳ ያርሾ ያርሺዛሶዛን ዲዛ ካጩታ ጊዶፌ ጊሪስ ሲያዲስ። * ¹⁴ ሄ ጊሪሳይካ ዲንኬ አይኪዳ ኡሱፑንሳ ኪታንቻዛላ “ዎጋ ሻፋን ኤፊራዒሴን ቃሹቲ ዲዛ አይዱ ኪታንቻታ ቢርሻ ዩዳ” ጊዴስ። ¹⁵ ሃይሳ ሃ ሳቴዛሲኔ ሃ ጋላሳስ፣ ሃ አጊናሲኔ ሃ ላይሳስ ጊጌቲዳ አይዱ ኪታንቻቲ አሳ ዜሬሳፌ ጩጎ ባጋ ዎዳና ማላ ቢርሼቲዳ። ¹⁶ ሄ ፓራን ኦሊዛ አሳታ ጮራቴሳይ ዪታታን ቆዴቲዛ ሚሎኔ ጊዲዳይሳ ታኒ ሲያዲስ።

¹⁷ ፓራቲኔ ሄ ፓራታ ቶጊዳ አሳታ ታኒ አጁታን ቤዩዳይቲ ሃይሳፌ ካሊዛይሳ ማላኮ! ኢስታስ ቲራ ቦላ ዲዛ ፀሩሬዚ ታማ ቦንቆ ማላ ዘያ፤ ሳሎ ማላ ካሬሳኔ ጋላልያ ሚሳቴስ። ፓራታ ሁዔይ ጋሞ ሁዔ ሚሳቴስ። ኢስታ ዱናፔ ታማይኔ ጩዋይ ዲኔ ጌቴቲዛ ሚሺ ኬዜስ። ¹⁸ ኢስቲ ባ ዱናፔ ኬሲዳ ታማይ ጩዋይኔ ዲኔይ ሃ ሄሹ ቦቻታን አሳ ዜሬሳፌ ጩጎይ ሃይቂዴስ። ¹⁹ ሄ ፓራታ ዎልቃይ ኢስታስ ዱና ጊዶኒኔ ጎይና ቦላ ዴስ። ኢስታ ጎይናይ ሾሽ ሚሳቴስ። ኢዛስ ሾሻ ሁዔይካ ዴስ። ኢስቲ አሴ ሄሳን ቆሄቲስ።

* 9:6 ኢዮ 3:21፤ ኤር 8:3 * 9:7 ኢዮ 2:4 * 9:8 ኢዮ 1:6 * 9:9 ኢዮ 2:5 * 9:11 አባዶኔ፣ አባዶኔይ ጊሪኬ ቃላራ “አጲሊዮኔ” ጌቴቲስ፤ ቢርሼላይካ “ፒቲ ዳይሳ” ጉሳ * 9:13 ኬሳ 30:1-3

20 ሃይታ ሃ ቦቻታን ሃይቆፔ አቲዳ አሳ ዜሬሳቲ ካሴ ባ አሉዳ ኢታ አሶፔ ሲሚዲ ማሮቴሳን ጌሊቤይቴና። ዳይዳንሳስ ዎርቃፌ፣ ቢራፔ፣ ሃርቂማላፔ፣ ሹቻፌ፣ ሚሳፌ፣ አሴቲዳ ሄላናስ ዎይኮ ሃይሳን ሲያናስ ዎይኮ ሃሙታናስ ዳንዳዮንታ ኤቃታስ ጎይኖ አጊቤይቴና። * 21 ሄሳሶካ ሺምፖ ዎዶፔ፣ ቢታፔ፣ ሳይማፌኔ ካይሶቴሳፌ ሲሚዲ ማሮቴሳን ጌሊቤይቴና።

10

ኪታንቻኔ ያሳ ማፃፋ ጉሳዮ

1 ሄሳፌ ጉዬ ሻራ ማይዲዳ ሃራ ሚኖ ኪታንቻይ ሳሎፔ ዱጌ ዎዲዛይሳ ቤያዲስ፤ ዙላይ ኢዛ ሁዔ ዩይ አዲዴስ። ኢዛ አይፌሶይ አዋ አርሼ ሚሳቴስ። ኢዛ ቶሆቲካ ታማ ቱስ ሚሳቴቴስ። 2 ሃሳፌ ቢርሼቲዳ ኢሲ ጉሳ ማፃፋ ዲዛሮ ባ ኩሼን አይኪ ኡቲዴስ። ኢዚ ባ ኡሻቻ ቶሆዛን አባ ሃዲሪሳ ቶሆዛን ቃስ ቢታ ዩዲ ኤቂዴስ። 3 ጋሞ ፃጎ ማላ ጊታ ቃላራ ፃጊዴስ። ኢዚ ፃጊዳ ማላ ላፑን ዳዳቲ ባ ጊሪሳ ሲሲዳ።

4 ላፑን ዳዳቲ ባ ጊሪሳ ሲሲዳ ማላ ታ ፃፋና ጋዳ ቆፓዲስ ሺን “ሃ ላፑን ዳዳቲ ዮቶይሳ ቁምዓ ዎሳ አቲን ፃፎፓ!” ጊዛ ቃላ ሳሎፔ ሲያዲስ።

5 ሄሳፌ ካሊዲ አባ ቦላኔ ቢታ ቦላ ኤቂ ዲሺን ታ ቤዩዳ ኪታንቻዚ ባ ኡሻቻ ኩሼ ፑዴ ሳሎ ዴንሲዲ፣ 6 ሜርናፔ ሜርናስ ዲዛይሳን ሳሎኔ ሳሎን ዲዛይታ ቃሴካ ቢታኔ ቢታ ጋርሳን ዲዛይታ፣ አባኔ አባ ጊዶን ዲዛይታ ሜዲዳ ያሳ ሱንህ ዩይጊ ጫቂዲ “ሃይሳፌ ጉዬ ኢዚ ጋምዔና! 7 ጊዶ አቲን ላፑንሳ ኪታንቻይ ባ ዛዩዛ ፑኒ ሲሲዛ ጋላሳታን ኢዚ ባ አሳንቻታሲኔ ናቤታስ ኤሪሲዳ ማላ ያሳ ፀራይ ፖሌታና” ጊዴስ። 8 ሄሳፌ ጉዬ ታኒ ሳሎፔ ሲዩዳ ቃላይ “አባ ቦላኔ ቢታ ቦላ ኤቂዳ ኪታንቻ ኩሼን ዶዩቲ ዲዛ ፃላ ማፃፋዛ ባዳ ኤካ!” ጊዲ ቃሴካ ታስ ዮቲዴስ።

9 ታኒ ቃስ ኪታንቻዛኮ ባዳ “ሂኖ ቁሪ ፃላን ዲዛ ማፃፋዮ ታስ ኢማ” ጋዲስ። ኢዚካ “ሄይ ኤካዳ ማ! ኢዛ ኔና ኔ ኡሎ ጊዶን ጫማና ሺን ዱናን ቃሴ ኔና ኤሳ ማላ ማልዓና” ጊዴስ።

10 ታካ ሄ ቁሪ ፃላ ማፃፋዮ ኪታንቻዛ ኩሼፔ ኤካዳ ማዲስ። ኢዛካ ታ ዱናን ታና ኤሳ ማላ ማልዓዱስ ሺን ታ ማዳ አጊን ጉዬፔ ታ ኡሎ ጊዶን ታና ጫማዱስ። 11 ሄሳፌ ቃሴ “ዳሮ ዱማ ዱማ ቆሞ አሳ ጊሽ ዱማ ዱማ ቃላን ሃሳይዛ አሳታ ጊሺኔ

* 9:20 ማዛ 115:4-7፣ 135:15-17፣ ዳኔ 5:23

ካዎታ ጊሽ ቃሴካ ቲንቢቴ ኔ የታና ማላ ኔስ ቤሴስ” ጌቴቴዲ ታስ የቴቴዴስ።

11

ናምዑ ማርካታ

¹ ሄሳፌ ጉዬ ታ ኢዛራ ዋዳ ዋዳናስ ጉፌ ሚሳቴዛ ሾምቦቆይ ታስ ኢሜቴዴስ። ታስ ሂዝጌቴዴስ “ኔኒ ዴንዳዳ ያሳ ኬሳዛኔ ጊዶ ኪፊሌታ ዋዳ! ሄን ጎይኒዛያታ ታይባ። * ² ያሳ ያሳ ኬሳፌ ካሬራ ጮ ዲዛሶዛ አጋጋ። ሄሲ አይዛቤታስ ኢሜቴዳሶ ጊዲዳ ጊሽ ኔ ኢዛ ዋዶ። አይዛቤቴ ጊሻ ካታማዮ አይዱ ታማኔ ናምዑ አጊና ጋካናስ ዩዲ ሃራና። * ³ ታ ማርካ ናምዳቴ ካዮ ማይዶ ማይዲዲ ኢሲ ሺያኔ ናምዑ ዪታኔ ኡሱፑን ታሙ ጋላስ ጋካናስ ቲንቢቴ የታና ማላ ታ ኢስታስ ዎልቃ ኢማና።”

⁴ ሄይቴ ቢታ ጎዳ ሲንሳን ኤቂዛ ናምዑ ዎጋራ ሚሳቴኔ ኢስታ ቦላ ያምፔ ቦሲዛ ናምዑ ባላታ። * ⁵ አኒካ ኢስታ ቆሃናስ ኮይኮ ኢስታ ዱናፔ ታማይ ኬዚዲ ኢስታ ሞርኬታ ፀጋና። ኢስታ ቆሃና ኮዩዛዴንቴ ዉሪ ሃይቃናይ ሄሳ ማላና። ⁶ ኢስቲ ቲንቢቴ የቴዛ ሄ ጋላሳታን ኢራይ ቡኮንታ ማላ ሳሎ ጎርዳናስ ማታይ ኢስታስ ዴስ። ሄሳሶካ ሃሳታ ሱሳን ላማናስ ኮይኮካ ሃራ አይ ማላ ቦሻንካ ቢታ ሾጫናስ ዎልቃይ ኢስታስ ዴስ። *

⁷ ኢስቲ ባ ማርካቴሳ ዉርሲዳፔ ጉዬ ሂርኪ ጨማ አላፌ ኬዚዛ ደዳይ ኢስታራ አሌቴዲ ኢስታ ያናናኔ ዎዳና። * ⁸ ኢስታ አሃይ ሌሚሶራ ሶዶሜኔ ጊብዪ ጌቴቴዛ ጊታ ካታማይን ጮ ዴንባን ዚንዓና። ሂና ካታማያ ካሴ ኢስታ ጎዳይ ኢዚን ካቂቴዳሶዮ።

* ⁹ ዱማ ዱማ ቆሞቴኔ ዱማ ዱማ ዛርኬቴ፣ ዱማ ዱማ ቃላን ሃሳዩዛይቴኔ ዴሬቴ ሄሹ ጋላሲኔ ባጋ ጋካናስ ኢስታ አሃ ያላናኔ ሄ ኢስታ አሃይ ሞጌቶንታ ማላ ዲጋና። ¹⁰ ሄይቴ ናምዑ ናቤቴ ካሴ ቢታ ቦላ ዲዛ አሳ ዎይሲዳ ጊሽ ሃዲ ቃስ ቢታ ቦላ ዲዛ አሳይ ሃ ናቤቴ ሃይቂዳ ጊሽ ኡፋዬታና። ሄ ኡፋይሳስ ባዓሌ ኦሲዲ ኢሶይ ኢሳስ ዩስ ኢማና። ¹¹ ጊዶ አቲን ሄሹ ጋላሲኔ ባጋይ አዲዳፔ ጉዬ ኢስታስ ሾምጋ ኢሚዛ ፔኖይ ያሳ አቻፌ ዩዲ ኢስታ አሃን ጌሊዴስ። ኢስቲካ ባ ቶሆን ኤቂዳ ኢስታ ቤዩዳ አሳይ ዳሮ ባቢዴስ። * ¹² ሄሳፌ ጉዬ ሄ ናምዑ ናቤቴ “ሃ ፑዴ ኬዚቴ!” ጊዛ ቃላ ሳሎፔ ሲዩዳ። ኢስታ ሞርኬቴ ኢስታ ያሊሺን ኢስቲ

* 11:1 ሂዚ 40:3፣ ዛካ 2:1-2 * 11:2 ሉቃ 21:24 * 11:4 ዛካ 4:3፣11-14 * 11:6 2ካዎ 17:1፣ ኬሳ 7:17-19፣ 1ሳሚ 4:8 * 11:7 ዳኔ 7:7፣21፣ አጃ 13:5-7፣ 17:8 * 11:8 ኢሳ 1:9-10 * 11:11 ሂዚ 37:10

ሻራራ ፑዴ ሳሎ ኬዚዳ። * 13 ሄ ሳቴዩንካ ዎልቃማ ቢታ ቃሲ ሃንዴስ። ሄ ካታማስ ታማፌ ኢሲ ኩሼይ ላሌቲዴስ። ቢታ ቃሳ ጋሶን ላፑን ሺ ዴሬይ ሃይቂዴስ። ሃይቆንታ አቲዳ አሳይ ቃስ ዳር ባቢዴሲኔ ሳሎ ያሳካ ቦንቺዴስ። *

14 አዬ አና! ጊዛ ቃላ ናምዓንጎሶዚ አዲን ሄቫንጎዛ ዋሶይ ኤሶን ጋካና።

ላፑንጎ ዛዬ

15 ላፑንጎ ኪታንቻይካ ባ ዛዬዛ ፑኒዴስ። ሳሎን ቃስ “አላሜ ካዎቴሲ ኑ ጎዳ ያሳሲኔ ኪርስቶሳስ ጊዲዴስ። አዚካ ሜርናፕ ሜርና ጋካናስ ካዎታና” ጊዛ ጊታ ቃላይ ሲዬቲዴስ። * 16 ያሳ ሲንሳን ባ አልጋ አልጋ ቦላ ኡቲዳ ናምዑ ታማኔ አይዱ ጨማቲካ ባ ሊጴን ጉፋኒዲ ያሳስ ጎይኒዳ። 17 ቃሴካ “ካሴካ፣ ሃዲካ ዲዛይሶ!

ኡባካ ዳንዳዩዛ ጎዳ ያሶ!

ኔኒ ኔ ጊታ ጎዳቴሳ ኔ ኩሼን አይኪዳ ጊሺኔ ካዎቲዳ ጊሽ ኑኒ ኔና ጋላቶስ።

18 አይዛቤይ ሃንቁቲዴስ፤

ካሴ ሃይቂዳይቲ ፐርዳ ዴሚዛ ዎዴይ ጋኪዴስ፤

ካሴ ኔ አሳንቻታ ናቤታሲኔ

ጌሻታስ ኔ ሱንሳካ ቦንቺዛይታስ፤

ጉሳታሲኔ ጊታታስ፤

ኔኒ ኢስታስ ኢስታ ዋጋ ኢሚዛ ዎዴይ ሃዲ ጋኪዴስ።

ቢታ ዳይሲዳይታ ኔ ዳይሳናስ ዎዴይ ጋኪዴስ” ጊዳ።

19 ሳሎን ዲዛ ያሳ ኬሳ ጊዶ ኪፊሌይ ዶዩቲዴስ። አዛ ጫቆ ታቦታዚካ ሄን ያሳ ኬሳስ ጊዶ ኪፊሌን ቤቲዴስ። ዎልቃንሳ ዎልቃሚዴስ፤ ጊርሲ ጊርዴስ፤ ዳዳይ ዳዳቲዴስ፤ ቢታ ቃሲኔ ዎልቃማ ሻቺ ቡኪዴስ። *

12

ማጫሳዮኔ ዳዌ ሾሻ

1 ሄሳፌ ጉዬ ጊታ ማላሊሲዛ ማላታይ ቦላ ሳሎ ቦላ ቤቲዴስ። ኢሲ ማጫሲያ አዋ አርሼ ማይዓዳ፣ አጊና ባ ቶሆን ዬዳዳ ታማኔ ናምዑ ያሊንቴታ አክሊሌ ማላ ባ ሁዔን ዎሳዳ ቤታዱስ። 2 አዛካ ሻራራ ዳዉስ። ዬሎ ሚፃይ ኢዞ አይኪን ሜቶታዳ ዋሳዱስ።

* 11:12 2ካዎ 2:11 * 11:13 አጃ 6:12፤ 16:18 * 11:15 ኬሳ 15:18፤ ዳኔ 2:44፤ 7:14፤27 * 11:19 አጃ 8:5፤ 16:21

3 ሄሳሶካ ሃራ ማላታይ ሳሎ ቦላ ቤተደስ። ኢዛስ ላፑን ሁዔይኔ ታሙ ካጩቲ ዲዛ ኢሲ ጊታ ዳዌይ ቤተደስ። ኢዛ ሁዔታ ቦላካ ላፑን ዛወደደቲ ደቴስ። * 4 ኢዚ ባ ጎይናራ ሳሎ የሊንቴታፕ ጩጎ ጊዲዛይታ ሳሎፕ ዱጌ ቢታን ዩጊደስ። ሄ ማጫሳያ ዩሊሺን ኢዛ ዩሊዛ ናዛ ሚታናስ ቆፒዲ ዳዌዚ ሄ ዩላናስ ማቲዳ ማጫሳይስ ሲንሳን ኤቁደስ። *

5 ማጫሳያካ ካሴ ደሬታ ኡባ ቢራታ ጉፊራ ሃሪዛ አቱማ ና ዩላዱስ ሺን ናዚ ቃስ ፑደ ያሳኮኔ ያሳ አልጋኮ ኤኬቲደስ። *

6 ማጫሳያካ ዱጌ ባዞ ቢታ ቤታዱስ። ሄ ባዳ ኢሲ ሺያኔ ናምዑ ጄታኔ ኡሱፑን ታሙ ጋላስ ጋካናስ ቦንቾን ዳናሶ ያሲ ካሴ ኢዚስ ጊጊስ ዎሲደስ።

7 ሳሎ ቦላ አላይ ደንዲደስ። ሚካሌይኔ ኢዛ ኪታንቻቲ ዳዌዛራ አሌቲዳ። ዳዌዚኔ ኢዛ ኪታንቻቲካ ዛሪዲ ሚካሌራኔ ኢዛ ኪታንቻታራ አሌቲዳ። * 8 ጊዶ አቲን ዳዌዚኔ ኢዛ ኪታንቻቲ ያኔቲዳ። ሄሳፌ ጉዩ ኢስታስ ሳሎን ዳናሶይ ቤቲቤና። 9 ሄ ጊታ ዳዌዚ ዱጌ ዩጌቲደስ። ኢዚካ ኩሚሳ አላሚዛ ባሌሊዛ ዳቡሎሳ ዎይኮ ሃላዔ ጌቴቲ ጄይጌቲዛ ቤኒ ዎዴ ሾሻዛ። ኢዚ ቃስ ዱጌ ቢታ ቦላ ዩጌቲደስ። ኢዛ ኪታንቻቲካ ኢዛራ ኢሲፌ ዩጌቲዳ። *

10 ሄሳፌ ጉዩ ኢሲ ጊታ ጊሪስ ሳሎፕ ሂዘጊሺን ታ ሲያዲስ “ሄኮ አሴ አሾይ፣ ዎልቃይኔ ካዎቴሲካ ኑ ጎዳስ ጊዲደስ። ማታይካ ኪርስቶሳስ ጊዲደስ። ኑ ኢሻታ ኑ ጎዳ ሲንሳን ጋላሲኔ ቃማ ሞቲዛ ኑ ኢሻታ ባርጋራይ ዱጌ ዩጌቲደስ። * 11 ኢስቲ ዶርሳዛ ሱሳኒኔ ባ ዮቲዳ ማርካቴሳ ቃላን ኢዛ ያኒዳ። ኢስቲ ባ ሺምፖስ ሚሼቶንታ ዲሼ ባና ሃይቆስ አሲ ኢሚዳ። 12 ሄሳ ጊሽ ሳሎቲኔ ኢስታ ጊዶን ዲዛይቲ ኢንቴ ዉሪካ ኡፋዩቲቴ። ኢዛስ ጉሳ ዎዴይ አቲዳይሳ ኤሪዳ ጊሽ ዳቡሎሲ ጊታ ሃንቆራ ዱጌ ኢንቴኮ ዎዲዳ ጊሽ ቢታሲኔ አባስ አዩ አና! አዩ አና!”

13 ዳዌዚ ዱጌ ቢታ ቦላ ዩጌቲዳይሳ ቤዩዲ አቱማ ና ዩሊዳ ማጫሳዮ ጎዴሬሲደስ። 14 ማጫሳያካ ባስ ጊጌቲ ዲዛሶ ፒራዳዳ ዱጌ ባዞ ባና ማላ ኢዚስ ጊታ ጎሌ ካፎ ቆፌ ሚሳቲዛ ናምዑ ቆፌቲ ኢሜቲዳ። ኢዛ ሄን ዳዌዛ ሲንሳፌ ሃካዳ ሄዥ ላይሲኔ ባጋ ጋካናስ ሎዎ ቦንቾን ናጌታዱስ። *

15 ሄ ማጫሳዮ ዲዎይ ኤኪ ባና ማላ ሾሻዚ ሻፋ ሃሴ ኬና ሃሴ ባ ዱናፕ ጩቲዲ ኢዚፕ ጉዩ ባጋራ ጉሲደስ። 16 ጊዶ አቲን

* 12:3 ዳኔ 7:7 * 12:4 ዳኔ 8:10 * 12:5 ኢሳ 66:7፤ ማዛ 2:9
* 12:7 ዳኔ 10:13፤ 21፤ 12:1፤ ዩሁ 9 * 12:9 ሜዴ 3:1፤ ሉቃ 10:18
* 12:10 ኢዮ 1:9-11፤ ዛካ 3:1 * 12:14 ዳኔ 7:25፤ 12:7

ቢታያ ሄ ማጫሳዮ ማዳዱስ። ባ ዱና ዶያዳኔ ሄ ዳዌዚ ጩቲዲ ጉሲዳ ሃሳካ ፀ-ንግዱስ። 17 ዳዌዚ ማጫሴይ ቦላ ሃንቁቲዲ ሃንኮ አቲዳ ኢዚ ዜሬሳታራ ኦሌታናስ ቢዴስ። ኢስቲካ ያሳ አዛዞታ ናጊዛይታኔ ዩሱሳስ አማኔቲዲ ማርካቲዛይታ። 18 ዳዌዚካ አባ አቻን አጩ ቦላ ኤቂዴስ።

13

ናምዑ ዶዓታ

1 ሄሳፌ ጉዩ ኢሲ ዶዓይ አባፌ ኬዚሺን ቤያዲስ። ኢዛስ ታሙ ካጩይኔ ሳፑን ሁዔይ ዴስ። ካጩታ ቦላ ታሙ ዛጩይቲ ዴቲስ። ሁዔታ ቦላ ጫሻ ሱንሳቲ ዴቲስ። * 2 ታ ቤዩዳ ዶዓዚ ማሄ ሚሳቲስ። ኢዛ ቶሆይ ዶዓ ዛርዶ ቶሆ ሚሳቲስ። ኢዛ ዱናይ ቃስ ጋሞ ዱና ሚሳቲስ፤ ዳዌዚ ባ ዎልቃ፥ ባ አልጋዛኔ ባ ጎዳቲሳካ ሄ ዶዓዛስ ኢሚዴስ። *

3 ሄ ዶዓዛ ሁዔታፕ ኢሳ ቦላ ዎዲዛ ማዱንሲ ዲዛይሳ ታ ቤያዲስ ሺን ኢዛ ሃይቆስ ጋሲዛ ማዱንሳዚ ፓጊዴስ። ኩሜሳ አላሜይ ማላሌቲዲ ሄ ዶዓዛ ካሊዴስ። 4 ሄ ዶዓዛስ ጎዳቲሲ ኢሜቲዳ ጊሽ አሳይ ወረካ ሄ ዳዌዛስ ጎይኒዴስ። “ሃይሳ ዶዓዛ ሚሳቲዛይ እኔ? ኢዛራ ኦሌታናስ ዳንዳዩዛይ እኔ?” ጊሼ ኢዛስ ጎይኒዴስ።

5 ኢዛስ ቃስ አቶሬቲሲኔ ጫሻ ቃላ ሃሳይዛ ዱናይ ኢሜቲዴስ። ኢዚ አይዱ ታማኔ ናምዑ አጊና ጋካናስ ጎዳቲሳን አሳና ማላ ኢዛስ ኢሜቲዴስ። 6 ያሳኔ ያሳ ሱንስ ኢዚ ዲዛሶዛኔ ሳሎን ዲዛይታ ጫሼ አይኪዴስ። 7 ኢዚ ጊሻታ አላና ማላኔ ያናና ማላ ኢዛስ ጎዳቲሲ ኢሜቲዴስ። ዱማ ዱማ ቆሞታኔ ዛርኬታ፥ ዱማ ዱማ ቃላን ሃሳዩዛ ዴሬታ ኡባ ቦላ ኢዛስ ጎዳቲሲ ኢሜቲዴስ። * 8 አላሜይ ሜዴቶሳፕ ሃ ሲሚን ኢስታ ሱንሲ ሹኬቲዳ ዶርሳዛ ዴዎ ማግፋን ጻፌቶንታ አላሜ ቦላ ዲዛ አሳይ ወረካ ሄ ዶዓዛስ ሆኪ ጎይናና። *

9 ሃይሲ ዲዛይይ ሲዮ! 10 “ዲዔታናስ ዲዛይይ ዲዔታና፤ ማሻን ሃይቃናስ ዲዛይይ ማሻን ሃይቃና” ሄሳ ጊዲዳ ጊሽ አማኒዛይታ ዳንዳያይኔ ኢስታ አማኔቲስ ኮሺዛይ ሃኒና። *

11 ቃሴካ ሃራ ዶዓይ ቢታፌ ኬዚሺን ቤያዲስ። ኢዛስ ቃስ ዶርሳ ካጩ ማላ ናምዑ ካጩይ ዴስ። ኢዚ ዳዌሶ ሃሳዩስ። 12 ኢዚ ካሴ ኮይሮ ዶዓዛ አላ ጌሊዲ ሄ ካሴይሳ ጎዳቲሳን አሴስ።

* 13:1 ዳኔ 7:3፤ አጃ 17:3፥7-12 * 13:2 ዳኔ 7:4-6 * 13:7 ዳኔ 7:21 * 13:8 ማዛ 69:28 * 13:10 ኤር 15:2፤ 43:11

ቢታያኔ ቢታ ቦላ ዲዛይቲ ወሪካ ካሴ ኮይሮ ዶዓዛስ ጎይናና ማላ አሲዴስ። ሄ ዶዓዛ ቃስ ካሴ ኢዛ ሃይቆስ ጋሲዛ ማዱንጎይ ፓዲዳ ኮይሮ ዶዓዛ። ¹³ ሄሲ ናምዓንጎሶ ዶዓዛ ቃስ አሳ ሲንጎን ታማ ሳሎፔ ዱጌ ዬጋና ጋካናስ ጊታ ማላታታ አሲዴስ። ¹⁴ ኢዚ ኮይሮ ዶዓዛ ሲንጎን ማላታ አሳና ማላ ኢዛስ ኢሜቲዳ ማላታ ጊዶን ቢታ ቦላ ዲዛ አሳ ኢዚ ባሌሲዴስ። ማሻን ማዱንዲ ፓዲዳ ዶዓዛ ቦንቾስ ሚሲሌ አሳና ማላ ቢታ ቦላ ዲዛ አሳ ወርሲ ኢዚ አዛዛና። ¹⁵ ናምዓንጎሶ ዶዓዛ ኮይሮ ዶዓዛ ሚሲሌዛስ ሼምፖ ኢማና ማላ ኢዛስ ጎዳቴሲ ኢሜቲዴስ። ዴዎ ሼምፖ ኢማናስ ኢዛስ ጎዳቴሲ ኢሜቲዳ ሚሲሌዛ ሃሳያና ማላኔ ሄ ኢዛስ ሆኪ ጎይኖንታዴ ኢዚ ወርሲካ ዎዳና ማላሳ።

¹⁶ ናምዓንጎሶ ዶዓዛ ቃስ ጉሳታ ጊዲን ዎይኮ ጊታታ ጊዲን፣ ዱሬታ ጊዲን ዎይኮ ማንቆታ ጊዲን፣ ጎዳታ ጊዲን፣ ዎይኮ አሽካራታ ጊዲን፣ ወሪካ ባ ኡሻቻ ኩሼን ዎይኮ ባ ሊጴ ቦላ ማላታ ዎልቃራ ዎሲሳና። ¹⁷ ሄሳ ማላን ሄ ዶዓዛ ሱንጎ ኤሪሲዛ ዱማ ማላታይ ዎይኮ ኢዛ ሱንጎ ኢዛ ቦላ ሃፌቲዳ ቁፁሬይ ባይንዳይይ አኒካ ጊያ ጌሊዲ ሻማናሲኔ ባይዛናስ ዳንዳዬና።

¹⁸ ሄሳ ጊሽ አሲ ኤራ ጊዳናይ ሃኒና። ዎዝናራ ዲዛዴይ አኬኮ፤ ሄ ዶዓዛ ቁፁሬዚካ ሃይሳፌ ካሊ ዲዛይሳኮ። ሄሲካ ኡሱፑን ዪታኔ ኡሱፑን ታማኔ ኡሱፑና።

14

ዶርሳዛኔ ዪታኔ አይዱ ታማኔ አይዱ ሺ አሳ

¹ ሄሳፌ ጉዬ ሄኮ ሄ ዶርሳዚ ዲዮኔ ዙማ ቦላ ኤቁዳይሳ ታ ቤያዲስ። ኢዛ ሱንጎኒ ኢዛ አዋ ሱንጎ ኢስታ ሊጴ ቦላ ሃፌቲዳይቲ ዪታኔ አይዱ ታማኔ አይዱ ሺ አሳቲ ኢዛራ ኢሲፌ ዴቴስ። ² ሳሎፔ ዎልቃማ ፒሳ ሃሳ ጊሪሲኔ ዎልቃማ ዳዳ ጊሪስ ሚሳቲዛ ጊሪሲካ ሲያዲስ። ታኒ ሲዬዳ ጊሪሳይ ዲሲ ሚሳቲዛ ባጋና ጌቴቲዛይሳ ዲዲዲ አሳይ ሲሲዛ ጊሪሳ ማላ ጊሪዛይሳ። ³ አልጋ ሲንጎኒኔ አይዱ ዶዓታ ሲንጎን ጪማታ ሲንጎን ዪታኔ አይዱ ታማኔ አይዱ ሺ አሳይ አራሳ ዬስ ዬዲዴስ። ሄ ዬሳዛካ ዴራ ጋርሳፌ ዶሬቲዳ ዪታኔ አይዱ ታማኔ አይዱ ሺ አሳፔ አቲን ሃራይ አኒካ ኢዛ ታማራናስ ዳንዳይቤና። ⁴ ሄይቲ ማቾንታይታ ጊዲዳ ጊሽ ኢስቲ ማጫራ አቁዲ ቱንቤቴና። ኢስቲ ዶርሳይ ቢዛሶ ኢዛ ካሌቴስ። ኢስቲ ዎሳሲኔ ኢዛ ዶርሳዛስ አሳ ጋርሳፌ ዪራ ካሳ ማላ ሺቁዳይታ። ⁵ ኢስቲ ዎርዶ ሃሳያ ኤሬቴና። ዎሶይካ ኢስታ ቦላ ባዋ። *

* 14:5 ሰፎ 3:13

የሳ ፐርዳ ኤሪሲዛ ሄቭ ኪታንቻታ

6 ሄሳፌ ጉዩ ቢታ ቦላ ዲዛ ዱማ ዱማ ቃላን ሃሳዩዛ ዱማ ዱማ ዱማ ዱማ ሳርኬታስ፣ ቆሞታስ፣ ኡባስ የታናስ ሚርና ሚሺራቾ ቃላ አይኪዳ ሃራ ኢሲ ኪታንቻይ ሳሎን ቦላን ፒራዲሺን ቤያዲስ። 7 ኢዚካ ባ ቃላ ዶቁ ሂስቲዲ “የሳስ ባቢቴኔ ኢዛ ቦንቸቴ። ኢዛ ፐርዳ ዎዴይ ጋኪዴስ። ሳሎኔ ቢታ፣ አባኔ ሃላ፣ ፕልቶካ ሜዲዳ የሳስ ጎይኒቴ” ጊዴስ።

8 ሃራ ናምዓንቶ ኪታንቻይ ቃስ “ዴሬዛ ወርሳ ማሶሲዛ ላይማ ዎይኔ ጫጄ ኡሺዳ ማጫሳያ ሂናካ ዎጋ ጊታ ባቢሎና ኩንዳዱስ! ኩንዳዱስ!” ጊሼ ኮይሮ ኪታንቻዛ ካሊዴስ። *

9 ሃራይ ሄቫንቶ ኪታንቻይ ቃስ ጊታ ዶቃ ሃሳን ሂዝጊሼ ኢስታ ካሊዴስ “ሄ ዶዓዛሲኔ ኢዛ ሚሲሌዛስ ጎይኒዛይቲኔ ባ ሊጴ ቦላ ዎይኮ ባ ኩሼ ቦላ ዎሲዛይቲ ወሪካ፣ 10 የሳ ሃንቆ ዎይኔ ጫጄዛ ኡያና። ሄሲካ ሄ ዎይኔ ጫጄዚ ሃራራ ዋላኪቶንታ ኢዛ ሃንቆ ፀዓቴ ዱቁቲዳይሳ፣ ሄሳሶካ ሃንኮ ጌሻ ኪታንቻታ ሲንሳኒኔ ዶርሳዛ ሲንሳን ታማኒኔ ዲኔ ታማን ፀጌታና። * 11 ኢስቲ ኢዛን ፀጌቲዛ ታማፕ ኬዚዛ ጩዋዚ ሚርፔ ሚርናስ ፑዴ ኬዚሼ ዳና። ሄ ዶዓዛሲኔ ኢዛ ሚሲሌዛስ ጎይኒዛይቲ ዎይኮ ኢዛ ሱንሳ ማላታ ባ ቦላ ዎሲዳይቲ ወሪካ ዎንታኔ ቃማን ኢስታስ ሽምፖይ ዴና።” *

12 የሳ አዛዞ ናጊዛይታፔኔ ዩሱሳ አማኖን ሚኒዳ ጌሻታፔ ኮይቲዛ ዳንዳያይ ሃኒንኮ።

13 ታኒ ሳሎፔ ሂዝጊዛ ቃላ ሲያዲስ “ሃይሳፌ ጉዩ ጎዳ ዩሱሳይታ ጊዲዲ ሃይቃናይቲ ኢስቲ አንጄቲዳይታ።” ዲሎ አያናይካ “ኤ፣ ኢስቲ ባ ዳቡርሳፌ ሽምፓና ማላ ኢስታ አሶይ ኢስታ ካላና” ጌስ።

ቢታ ቦላ ጎዳ ሃንቆ

14 ሄሳፌ ጉዩ ታ ዲሊሺን ታስ ቦላ ሻራይ ቤቲዴስ። ሄ ሻራ ቦላ ቃስ ና ሚሳቲዛይ ኡቲዴስ። ኢዚ ቃስ ባ ሁዔ ቦላ ዎርቃ አክሊሌ ዎሲዴስ። ባ ኩሼንካ ቃራ ባጫ አይኪዴስ። * 15 ሃራ ኪታንቻይ የሳ ኬሳፌ ኬዚዲኔ ሻራ ቦላ ኡቲዳይሳስ ዶቃ ቃላራ “ቢታ ቦላ ቦኔይ ጋኪዴስ! ካሳይ ጫኪቲዛ ሳቲይ ማቲዴስ” ጊሼ ዋሲዴስ። * 16 ሄ ሻራ ቦላ ኡቲዳይሲ ባጫዛ ዱጌ ቢታ ቦላ ዩዲዴስ። ቢታይካ ጫኪቲዴስ።

* 14:8 ኢሳ 21:9፣ ኤር 51:8፣ አጃ 18:2 * 14:10 ኢሳ 51:17፣ ሜዴ 19:24፣ ሂዚ 38:22 * 14:11 ኢሳ 34:10 * 14:14 ዳኔ 7:13 * 14:15 ኢዩ 3:13

17 ቃሴ ሃራ ኪታንቻይ ቦላ ሳሎን ዲዛ ዎሳ ኬሳፌ ኬዚዴስ። ሄ ኢዚካ ቃራ ባጫ ባ ኩሼን አይኪዴስ።

18 ታማ ቦላ ኢዛስ ጎዳቴላ ዲዛ ሃራ ኪታንቻይ ያርሾ ኢዛ ቦላ ሺሺዛሰዛ አቻፌ ኬዚዲ ሄ ቃራ ባጫ አይኪዳ ኪታንቻዛስ “ሚሳ አይፌይ ካዲዳ ጊሽ ኔኒ ሃዒ ኔ ቃራ ባጫዛ ዩዳዳ ዎይኔ ሚሳ አይፌዛ ዉርሳ ጫካዳ ቢታፌ ሺሻ” ጊዲ ጊታ ቃላን ዋሲዴስ።

19 ኪታንቻዚካ ባጫዛ ዱጌ ቢታ ቦላ ዩዲዲ ቢታን ዲዛ ዎይኔ ሚሳ አይፌዛ ጫኪዲ ዎጋ ያሳ ሃንቆ ዎይኔ አይፌ ጉምዒዛሶን ዩጊዴስ። 20 ካታማፔ ካሬ ባጋራ ዲዛ ዎይኔ ሚሳ አይፌ ጉምዒዛሶን ጉሜዒቲዴስ። ሄ ጉምዒዛሶዛፔካ ቢታፌ ዶቃቴላ ፓራ ቢፃላ ጋካናሲኔ ኢሲ ሺያኔ ኡሱፑን ዪት ኪሎሜቲሬ ጊዲዛሶ ጋካናስ ሱላ ጎጊዴስ። *

15

ዉርሴሳ ቦሻታ አይኪዳ ኪታንቻታ

1 ታኒ ሃራ ዎልቃማ ማላታ ሳሎ ቦላ ቤያዲስ። ያሳ ሃንቆይ ኢስታን ፖሌታናስ ዉርሴሳ ጊዲዳ ላፑን ቦሻታ አይኪዳ ላፑን ኪታንቻታ ቤያዲስ።

2 ሄሳፌ ጉዬ ታማራ ዋላኬቲዳ ማስቶቴ አባ ሚሳቲዛ ሚሽ ቤያዲስ። ሄሳሶካ ሄ ዶዓዛኔ ኢዛ ሚሲሌዛ ኢዛ ሱንሳ ቁፁሬዛ ማላታ ያኒዳይታ ቤያዲስ። ያሲ ኢስታስ ኢሚዳ ዲሳ ማላ ባጋና ጌቴቲዛይሳ አይኪዲ ማስቶቴ ሚሳቲዛ አባ አቻን ኤቂዳ። 3 ያሳ አሳንቻ ሙሴ ዩሳኔ ዶርሳዛ ዩሳ። “ኡባ ዳንዳዩዛ ጎዳ ያሶ!

ኔ አሶይ ጊታኔ ማላሊሲዛዛ፤ ዴሬ ካዎዞ!

ኔ አጌይ ሊኬኔ ቱማ። **

4 ጎዶ ኔስ ባቦንታ አሲኔ

ኔ ሱንሳ ቦንቾንታ አሲ ኦኔ?

ኔኒ ኔርካ ጌሻ፤

ኔ ቱማ ፐርዳይ ቆንጫዳ ጊሽ ዴሬቲ ዉሪ ዩዲ

ኔ ሲንሳን ኔስ ጎይናና” ጊ ዩዲዳ *

5 ሄሳፌ ጉዬ ታዛራ ያሊሺን ካሴ ማርካቴሳ ዱንካኔ ጊዲዳይሲ ያሳ ኬላ ሳሎን ዶዩቲዴስ። * 6 ላፑን ቦሻታ አይኪዳ ላፑን ኪታንቻቲ ያሳ ኬሳፌ ኬዚዳ። ኢስቲ ቃስ ጌሽ ጊዲዲ ያልቂዛ

* 14:20 ኢሳ 63:3፤ ኤር ዚላ 1:15፤ አጃ 19:15 * 15:3 ዴሬ ካዎዞ፤ ኢሲ ኢሲ ቢርሼላቲ ዎዴታ ካዎዞ ጌቴስ። * 15:3 ኬሳ 15:1 * 15:4 ኤር 10:7፤ ማዛ 86:9 * 15:5 ኬሳ 38:21

በላ ማይያ ማይዲዳ። ዎርቃፌ አሴቲዳ ዳንጮ ማላ ማይያ ቲራ በላ ቃቹዳ። 7 አይዱ ደዓታፔ ኢሶይ ላፑን ኪታንቻታስ ሜርናፔ ሜርናስ ዲዛ ሶሳ ሃንቆይ ኢስታን ኩሚ ኡቲዳ ላፑን ዎርቃ ፀዓታ ኢሚዴስ። 8 ሶሳ ኬሳይካ ሶሳ በንቆፌኔ ኢዛ ዎልቃፌ ዴንዲዳይሳን ጩዋይ ኢዛን ኩሚዴስ። ላፑን ኪታንቻቲ ባ ኩሺን አይኪዳ ላፑን በሻቲ ፖሌታና ጋካናስ አኒካ ሄ ሶሳ ኬሴ ጌላናስ ዳንዳይቤና። *

16

ሶሳ ሃንቆራ ዲዛ ፀዓታ

1 ሄሳፌ ጉዬ ላፑን ኪታንቻታ “ኢንቴ ቢዲ ሶሳ ሃንቆ አይኪዳ ላፑን ፀዓታ ዱጌ ቢታ በላ ጉሲቴ!” ጊዛ ጊታ ቃላይ ሶሳ ኬሳፌ ኬዚሺን ታ ሲያዲስ።

2 ኮይሮ ኪታንቻዚ ቢዲ ፀዓዛ ቢታ በላ ጉሲዴስ። ደዓዛ ማላታይ ኢስታ በላኔ ሄ ደዓዛ ሚሲሌስ ጎይኒዛያታ በላ ኢታ ዋይሲዛ ማዱንስ ኬዚዴስ። *

3 ናምዓንሶ ኪታንቻዚ ቃስ ፀዓዛ አባ በላ ጉሲዴስ። አባይካ ሃይቂዳ አሳ ሱላ ማላ ጊዲዴስ። አባ ጊዶን ሽምፖራ ዲዛይቲ ዉሪካ ሃይቂዳ።

4 ሄሻንሶ ኪታንቻይ ባ ፀዓዛ ሻፋታ በላኔ ፑልቶ ሃላታ በላ ጉሲዴስ። ሄ ኢስቲካ ሱላ ጊዲዳ። 5 ሃላ በላ ኢዛስ ጎዳቴሲ ዲዛ ኪታንቻዚ፣ “ካሴካ ሃዲካ ዲዛ ጌሻ ጎዶ! ኔኒ ሄሳሶ ፒርዲዳ ጊሽ ኔኒ ቱማንቻ። 6 አሳይ ካሴ አማኒዛይታ ሱሲኔ ናቤታ ሱላ ጉሲዳ ጊሽ ኔ ኢስታ ሱላ ኡሻዳሳ። ሄሲካ ኢስታስ ቤሴስ” 7 ያርሾ ያርሺዛሶዛፔ ቃስ “ኤ ዉርሳ ዳንዳይዛ ጎዳ ያሶ! ኔ ፒርዳቲ ዉሪካ ቱማኔ ሊኬ” ጊዛ ቃላ ሲያዲስ።

8 አይዳንሶ ኪታንቻዚ ባ ፀዓዛ አዋ አርሼ በላ ጉሲዴስ። አዋ አርሼይካ አሳ ባ ሴላን ፀጋና ማላ አዋ አርሼስ ዎልቃይ ኢሜቲዴስ። 9 አሳይካ ዎልቃማ ሴላን ፀጌቲዴስ። ሄ በሻታ በላ ሽኔይ ኢዛስ ዲዛ ሶሳ ሱንስ አሳይ ጫዴዴስ አቲን ማሮቴላን ጌሊቤናኔ ኢዛካ በንቆቤና።

10 ኢቻሻንሳ ኪታንቻይ ባ ፀዓ ደዓዛ አልጋ በላ ጉሲዴስ። ሄ ደዓዛ ካዎቴሲ ቃስ ዱሚዴስ። አሳይ ቃስ ዋዬዛፔ ዴንዲዳይሳን ባርካ ባ ኢንፃርስ ጋርጨዴስ። 11 ኢስቲ ቃስ ሄ ማዱንሳ ሳኮፔ ዴንዲዳይሳን ሳሎ ሶሳ ቃንጊዳ አቲን ማሮቴላን ጌሊቤቴና።

* 15:8 ኬሳ 40:34፣ 1ካዎ 8:10-11፣ 2ታር 5:11-14፣ ኢሳ 6:4 * 16:2 ኬሳ 9:10

12 ኡሱፑንሳ ኪታንቻይ ቃስ ባ ፀዓዛ ዎጋ ኤፊራጊሴ ሻፋን ጉሲዴስ። አዋ አርሼይ ሞኪዛ ባጋፌ ያና ካዎታስ ኦጌ ጊጊሳና ማላ ሻፋዚ ሜሊዴስ። 13 ሄ ዳዌዛ ዱናፔኔ ሄ ዶዓዛ ዱናፔ፣ ዎርዶ ናቤዛ ዱናፔ ኦቃርስ ሚሳቲዛ ሄዡ ቱና አያናቲ ኬዚሺን ታ ቤያዲስ። 14 ሄይቲ ቃስ ማላታታ አሲዛ ዳይዳንሳ አያናታ። ሄይቲ አያናቲ ዉርሲ ዳንዳዬዛ ጎዳ ጊታ ጋላስ ሃናና አላስ አሳ ሺሻናስ አላሜ ካዎቲ ዲዛሶ ኡባ ባና።

15 “ሄኮ ታኒ ካይሶ ማላ ቆፖንታ ጋካ ዎዳና። ኢዚ ካሎቲን አሳይ ኢዛ ካሎቲስ ቤዮንታ ማላ ቤጊዲኔ ባ ማይዎ ናጊዛ አሲ ጋላቲቲዳዴ!” *

16 አያናቲካ ካዎታ ኢብራዌ አሳ ቃላራ፣ “አርማጌዶኔ” ጌቲቲዛ ሶ ሺሺዳ። * 17 ላፑንሳ ኪታንቻዚ ባ ፀዓዛ ጫርኮ ቦላ ጉሲዴስ። ያሳ ኬሳ ጊዶን ዲዛ አልጋዛፔ “ፖሌቲዴስ” ጊዛ ዎልቃማ ቃላይ ኬዚዴስ። 18 ዎልቃንሲ፣ ዳዳ ጊሪሲኔ ጉጉንሲ፣ ጊታ ቤታ ቃሲ ሃኒዴስ። አሲ ቤታ ቦላ ሜዴቶሳፔ ሃኖ ጋካናስ ሄሳ ማላይ ቤታ ቦላ ሃኒ ኤሬና። * 19 ዎጋ ካታማያ ሄዡ ኬዛ ሻኬታ ዎዳዶስ። አይዘቤታ ካታማቲ ላሌቲዳ ያሲ ዎጋ ካታማዮ ባቢሎኔ ዛሪ ቆፐዴስ። ሚኖ ሃንቆ ፀዓን ኩሚ አቲዳ ዎይኔ ጫጄ ኡሻ ኡያና ማላ አሲዴስ። * 20 አባ ጊዶን ዲዛ ዴሬቲ ዉሪካ ባቃቲዳ፤ ዙማቲካ ቤቲቤቴና። * 21 ኢሲ ኢሲ ሻቺ አይዶ ታማኔ ኢቻሹ ኪሎ ጊዲዛ ሻቺ ሳሎፔ ዱጌ አሳ ቦላ ዎዳዴስ። ቦቻዚ ዳሮ ኢታ ጊዲዳ ጊሽ አሳይ ሄ ሻቻ ቦሻ ጌዶን ያሳ ጫዬዴስ። *

17

ላይማን ኤሬቲዳ ማጫሳዮኔ ዶዓዛ

1 ላፑን ፀዓታ ባ ኩሺን አይኪዳ ላፑን ኪታንቻታፔ ኢሶይ ሃ ታኮ ዪዲ ታስ “ሃ ያ፣ ዳሮ ሃሳታ ቦላ ኡቲዳ ሄ ኢታ ላይማ ማጫሳይ ቦላ ጋኪዛ ፐርዳ ታ ኔና ቤሳና። * 2 ቤታ ቦላ ዲዛ ካዎቲ ዉሪካ ኢዚራ ላይማቲዳ። ቤታ ቦላ ዲዛ አሳይካ ኢዚ ላይማቴሳ ዎይኔ ጫጄን ማላቲዴስ” ጊዴስ። *

3 ሄሳፌ ጉዮ ኪታንቻዚ ታና አያናን ዱጌ ባዞ ቤታ ኤፊዴስ። ኢዛ አሳቴሳዚ ኩሜስ ጫሻ ሱንሳን ዓሬቲዳ ላፑን ሁዔቲኔ ታሙ ካጨቲ ዲዛ ኢሲ ዞዎ ዶዓዛ ቦላ ኡቲዳ ኢሲ ማጫሳዮ ቤያዲስ።

* 16:15 ማቶ 24:43-44፤ ሉቃ 12:39-40፤ አጃ 3:3 * 16:16 2ካዎ 23:29፤ ዛካ 12:11 * 16:18 አጃ 8:5፤ 11:13፤19 * 16:19 ኢሳ 51:17 * 16:20 አጃ 6:14 * 16:21 ኬሳ 9:23-24፤ አጃ 11:19 * 17:1 ኤር 51:13 * 17:2 ኢሳ 23:17፤ ኤር 51:7

* 4 ሄ ማጫሳያ ጋላልዎ ማላ ማይዎኔ ዞዎ ማይዎ ማይዎዱስ፤ ዎርቃን፣ ቦንሾ ሹቻኒኔ ኢንቆ ጌቴቴዛ አልዎ ሚሺ ማይዎዳ ጳላጧስ፤ ኢዛ ባ ኩሼን ቃስ ኢታ ሹኒዛ ሚሺኔ ባ ቱና ላይማቴሲ ኢዛን ኩሚዳ ዎርቃ ፀ-ዓ አይካ ኡታዱስ። * 5 ኢዚ ሊጴ ቦላ “ፀ-ራ፣ ላይማቴዛይታሲኔ ቢታ ቦላ ቱና አሲዛይታስ አዮ ዎጋ ባቢሎኔ” ጌቴቴዛ ሱንሲ ፃፊቴ ኡቴዴስ። 6 ሂና ሄ ማጫሳያ ጌሻታ ሱሳኒኔ ዩሱሳ ሱንሳን ሃይቂዳ አሳ ሱሳን ማሶቴዳሮ ታኒ ቤዳዲስ። ታ ኢዞ ቤያዳ ዳሮ ማላሌታዲስ። 7 ጊዶ አቴን ኪታንቻዚ ቃስ ታና “ኔ አዛስ ማላሌታይ? ሃ ማጫሳያ ፀ-ራ ዮዶኔ ኢዛ ኢስታ ቦላ ኡቴዳ ላፑን ሁዔታኔ ታሙ ካጩቴ ኢዛስ ዲዛ ዶዓዛ ፀ-ራ ታ ኔስ ቆንጨሳና። 8 ኔ ቤዩዳ ዶዓዚ ካሴካ ዲዛይሳኮ ሺን ሃዒ ዴና። ኢዚ ጉዩፔ ጨማ አላ ጊዶፊ ኬዛናኔ ጌዴ ጳዮሶ ባና፤ አላሚይ ሜዴቶሳፔ ኢስታ ሱንሲ ዴዎ ማፃፋን ፃፊቶንታ ቢታ ቦላ ዲዛ አሳይ ሄ ዶዓዚ ካሴካ ዲዛይሳ ሃዒ ቃስ ዶንታይሳ ጉዩፔ ያናይሳ ጊዲዳይሳ ቤዩዲ ማላሌታና። *

9 “ዩሺ ቆፒዛ ኤራ አሲ ኮዩቴዛይ ሃኒና። ላፑን ሁዔቴ ሄ ማጫሳያ ኢስታ ቦላ ኡቴዳ ላፑን ዙማታ። ሄይቴካ ላፑን ካዎታኮ። 10 ሄ ላፑን ካዎታፔ ኢቻሻቴ ኩንዲዳ። ኢሶይ ሃዒ ዴስ። ሃንኮይሲ ቃስ ቡሮ ዩቤና። ኢዚ ዩዲ ጉላ ዎዴ ታካናስ ቤሴስ። 11 አስፑንሶ ካዎዚ ካሴ ዲዛዴ ሺን ሃዒ ቃስ ባይንዳ ዶዳኮ። ኢዚ ላፑናታፔ ኢሳ። ኢዚካ ጌዴ ጳዮሶ ባና።

12 “ኔ ቤዩዳ ታሙ ካጩቴ ቡሮ ካዎቶንታ ታሙ ካዎታ። ጊዲኮካ ኢስቴ ሄ ዶዓዛራ ኢሲፊ ኢሲ ሳቴስ ዶዓዛራ ካዎታናስ ካዎቴሳ ዎልቃ ዴማና። * 13 ሄ ታሙ ካዎታስ ኢሲ ቆፋይ ዴዓና። ኢስቴ ባ ዎልቃኔ ባ ጎዳቴስ ሄ ዶዓዛስ አሲ ኢማና። 14 ኢስቴ ዶርሳዛ ቦላ አላ ዴንሳና ሺን ዶርሳዚ ጎዳታስ ጎዳኔ ካዎታስ ካዎ ጊዲዳ ጊሽ ኢዚ ኢስታ ያናና። ኢዛራ ዲዛይቴ ሄይጌቴዳይታ፣ ዶሬቴዳይታኔ አማኔቴዳይታ” ጊዴስ። 15 ሄ ኪታንቻዚካ ታስ “ሃ ላይማ ማጫሳያ ኢስታ ቦላ ኡታ ዲሺን ኔኒ ቤዩዳ ሃሳታ፣ ዴሬታ፣ አሳታ፣ ዱማ ዱማ ቆዎታ ቃሴካ ዱማ ዱማ ቃላን ሃሳዩዛይታ። 16 ሄ ዶዓዚኔ ኔ ቤዩዳ ታሙ ካጩቴ ሄ ላይማ ማጫሳዮ ኢዪቴስ። ኢስቴ ኢዞ ጳዮሶ ጋሳና፤ ካሎ ሚላ አሻና፤ ኢስቴ ኢዚ አሾ ማናኔ ኢዞ ታማንካ ፀ-ጋና። 17 ባ ቆፋ ፖላናስ ሃይሳሶ አሳና ማላ ሄሳ ሄ ቆፋ ኢስታ ዎዝናን ዎሲዳይ ያሳ። ሄሳ ጊሽ ያሳ ቃላይ ፖሌታና ጋካናስ ኢስቴ ቆፋን ኢሲዮ ጊዳና። ባ ካዎቴሳ ጎዳቴሳካ ሄ ዶዓዛስ አሲ ኢማና። 18 ኔ ቤዩዳ

* 17:3 አጃ 13:1 * 17:4 ኤር 51:7 * 17:8 ዳኔ 7:7፤ አጃ 11:7፤ ማዛ 69:28 * 17:12 ዳኔ 7:24

ማጫሳያ ቢታ ካዎታፔ ቦላራ ካዎታና ዲዛ ዎጋ ጊታ ካታማዮ” ጊዴስ።

18

ባቢሎኔ ኩንዴስ

¹ ሄሳፌ ጉዬ ጎዳቴሲ ኢዛስ ዲዛ ሃራ ኪታንቻይ ሳሎፔ ዱጌ ዎዲሺን ቤያዲስ። ኢዛ ቦንቾ ፖፖፔ ዴንዲዳይሳን ቢታይካ ፖዲዴስ።

² ኢዚ ቃስ ዶቃ ቃላን “ጊታ ባቢሎና ኩንዳዱስ! ኩንዳዱስ! ኩንዳዱስ! ዳይዳንሳ ዱሳ ሶ ጊዳዱስ! ቱና አያናታስ አቆሶ ጊዳዱስ! ሃራሲዛ ኢታ ካፎታስ ሽምፖሶ፣ ኢታኔ ሃራሲዛ ዶዳታሲካ አቆሶ ጊዳዱስ። * ³ ዴሬ አሳ ዉርሳ ማሶሲዛ ባ ላይማቴሳ ዎይኔ ጫጄዛ ኡሻዱስ። ቢታ ቦላ ዲዛ ካዎቲ ኢዚራ ላይማቲዳ። ቢታ ቦላ ዲዛ ዛልዓንቻቲ ኢዚስ ዲዛ ኢሻሎ ዱሳፌ ዴንዲዳይሳን ዳር ዱሬቲዳ” ጊ ዋሲዴስ *

⁴ ቃሴካ ሃራ ቃላይ ሳሎፔ “ታ ዴሬቶ! ኢንቴ ኢዚራ ኢዚ ናጋራን ዙፔቶንታ ማላኔ ኢዞ ጋኪዛ ቦሻ ኢንቴ ኢዚራ ጊሼቲ ኤኮንታ ማላ ኢዚፔ ሻኬቲ ኬዚቴ። * ⁵ ኢዚ ናጋራይ ዶሬቲዳ ፑዴ ሳሎ ጋኪዴስ። ያሲካ ኢዚ ሞሮዛ አከኪዴስ። * ⁶ ኢዚ ኢሚዳሪ ጊና ኢዚስ ኩሼ ዛሪቴ፤ ኢዚ አሶ ጊሽ ኢዚስ ናምዑ ኩሼ ጨጊቴ፤ ኢዚስ ናምዑ ኩሼ ኢዚይሳፌ አሲ ዋላኪቴ። * ⁷ ኢዛ ባስ፣ ባ ቦንቾሲኔ ባስ ጊጋና ማላ ኢሞይሳ ጊና ዋዬኔ ሙዞቴሳ ኢዚስ ኢሚቴ፤ ኢዛ ባ ዎዝናራ ‘ታኒ ካዎ ማቺ ማላ ኡታዲስ አቲን አምዲ ማላ ጊዲኬ። ታና ሙዞቴሲ ሙሌካ ጋከና’ ጋዳ ጨቁታዉስ። ⁸ ሄሳ ጊሽ ኢዚ ቦላ ቦቻይ ዉሪካ ኢሲ ጋላስ ጋካና። ሃይቆይ፣ ሙዞቴሲኔ ጋፋይ ኢዞ ጋካና፤ ኢዛ ታማን ፀጌታና፤ ኢዚ ቦላ ፐርዲዛ ጎዳይ ያሲ ኢዚ ሚኖ” ጊሺን ታኒ ሲያዲስ።

⁹ ኢዚራ ላይማቲሼ ኢሻሎ ዱስ ዴዩዳ ሃ ቢታ ካዎቲ ኢዛ ፀጌቲሺን ጨዋቲዛ ጨዋ ቤዩዲ ኢዚ ጊሽ ዋሲዲ ዬካና። ¹⁰ ኢዚ ዋዬዛስ ባቢዳ ጊሽ ሃሆን ኤቁዲ “ሃኔ ጊታ ካታማዮ! ሃኔ ሚኖ ካታማዮ ባቢሎኔ! ኔ ፐርዳይ ሜዒ ኢሲ ሳቴ ጊዶን ዩዳ ጊሽ ኔስ አዩ አና! አዩ አና!” ጋና።

* 18:2 ኢሳ 21:9፣ ኤር 51:8፣ አጃ 14:8፣ ኢሳ 13:21፣ ኤር 50:39
* 18:3 ኢሳ 23:17፣ ኤር 51:7 * 18:4 ኢሳ 48:20፣ ኤር 50:8፣ 51:6፣45 * 18:5 ሜዴ 18:20-21፣ ኤር 51:9 * 18:6 ማዛ 137:8፣ ኤር 50:29

11 ሃይሳፌ ጉዬ ኢስታ ማርካቤን ጫኔቲዳዝ ሻሚዛ አሲ ባይንዳ ጊሽ ቢታ ቦላ ዲዛ ዛልዓንቻቲ ኢዚስ ዩካናኔ ካዮታና። * 12 ኢስታ ማርካቤን ጫኔቲዳይ ዎርቃ፥ ቢራ፥ አልዎ ሹች ኢንቁ፥ ሌዔ ማይዎ፥ ጋላልዎ ማላ ማይዎ፥ ሃሬ ጌቴቲዛ ማይዎ፥ ዞዎ ማይዎኔ ሎዎ ሳዎ ሳዊዛ ሚሰ ኡባ፥ ዳንጋርሳ ዛሌ፥ አልዎ ሚሳፌ፥ ሃርቀማላፕ ቢራታፕኔ ዎሊዎጆፌ ኦሴቲዳ ሚሺ ወሪካ 13 ቃራፋ፥ ሳዎ፥ ሳዊዛ ሚሲ፥ ካርቤ፥ ኤፃኔ፥ ዎይኔ ጫጄ፥ ዎጋራ ዛይቴ፥ ዲሌ፥ ጊስቴ፥ ሚዝ፥ ዶርሳታ፥ ፓራታ፥ ፓራ-ጋሬታ፥ አይሌታኔ ሃራ አሳታኮ።

14 ዛልዓንቻቲ “ሃኔ ኔኔ አሞቲዳ ሎዎ ሚሻቲ ወሪካ ኔፕ ሃኪ ቢ ጊዲዳ፥ ኔ ሃሮይካ ኔ ጌዩይካ ወሪካ ዳዩዴስ። ሃይሳፌ ጉዬ ኔኔ ሄይታንታ ሙሌካ ዛራ ዴማካ!” ጋና። 15 ሄይታንታ ወርሲ ሻሚ ሻሚዲ ዱሬቲዳ፥ ዛልዓንቻቲ ኢዚ ቦላ ጋኪዳ ዋዩዛሰ ባቢዲ ሃሆን ኤቃና፥ ዩኪሽኔ ሙዞቲሽ * 16 “ካሴ ሌዔ ማይዎኔ ጋላልዎ ማይዎ ቃሴካ ዞዎ ማይዎ ማይዲዛሪስ፥ ዎርቃኔ ቦንቾ ሹቻን፥ ኢንቁንካ ጳሊዳ ጊታ ካታማይስ አዬ አና! አዬ አና! 17 ሄሳ ማላ ሃሮይ ኢሲ ሳቴ ጋርሳን ዳዩዴስ” ጋና።

ማርካቤ አዛዚዛይቲ ወሪ ማርካቤን ቢዛይቲ ወሪ ማርካቤ ጊዶን አሲዛይቲ ወሪካ አባ ጊዶን ዛልዓንቻቲ ወሪካ ሃሆን ኤቃና። * 18 ኢዛ ፀ-ጌቲሽን ጨዋቲዛ ጨዋ ቤዩዲ “ሃኖ ሃ ጊታ ካታማዮ ሚሳቲዛ ካታማይ ሃራይ አዋን ዳንዴ?” ጊሽ ዋሲዳ። * 19 ባ ሁዔን ጉዳላ ቆሊዲ ዩኪሽኔ ሙዞቲሽ “አባ ቦላ ማርካቤይ ዲዛይቲ ወሪካ ኢዚ ሚሽን ዱሬቲዳይቲ፥ ሂና ጊታ ካታማዮ ኢሲ ሳቴ ጊዶን ሙሌራ ዳይዳ ጊሽ ኢዚስ አዩ-አና! አዩ-አና!” ጊ ዋሲዳ። * 20 ሳሎዞ! ኢዚ ጌዶን ኔ ኡፋዩታ፤ ያሲ ኢንቴ ጊሽ ኢዚ ቦላ ፒርዲዳ ጊሽ ኢንቴ ጌሻቲ፥ ሃዋሬቲኔ ናቤቲካ ኡፋዩቲቴ። *

21 ሄሳፌ ጉዬ ኢሲ ሚኖ ኪታንቻይ ዎልቃማ ዎፃ ሹች ሚሳቲዛ ኢሲ ሹች ዴንሲዲ “ጊታ ካታማዮ ባቢሎና ሄሳሶካ ዎልቃራ ሱጌታዳ ኩንዳና። ሃይሳፌ ጉዬ ሙሌካ ቤቱኩ። * 22 ዲስ ሚሳቲዛ ባጋና ጌቴቲዛይሳ ሾጨዛይታኔ ዩሰ ዩፃዛይታ ዩሳ ሱሱልዔ ሱሱልዒዛ አሳይኔ ዲንኪ ፑኒዛይታ ጊሪስ ናሞዓንሶ ኔናን ሲዩቴና። አይ ማላ ኩሽ ሂላቴሰ አሲዛ ኡራ አሲ ሃይሳፌ ጉዬ ኔናን ቤቴና፤ ዎፃ ጊሪስ ሃይሳፌ ጉዬ ኔናን ሲዩቴና። *

* 18:11 ሂዚ 27:31፥36 * 18:15 ሂዚ 27:31፥36 * 18:17 ኢሳ 23:14፤ ሂዚ 27:26-30 * 18:18 ሂዚ 27:32 * 18:19 ሂዚ 27:30-34 * 18:20 ዛሬ 32:43፤ ኤር 51:48 * 18:21 ኤር 51:63-64፤ ሂዚ 26:21 * 18:22 ኢሳ 24:8፤ ሂዚ 26:13

23 ታማ ፖያይ ሃይሳፌ ጉዬ ኔናን ፖዔና። አደኔ ማጫ ሚሺራ ቃላይ ሃይሳፌ ጉዬ ኔናን ሲዮቴና። ኔ ዛልዓንቻቲ ካሴ አላሜን ኤሬቲዳይታ። ኔኒ ቃስ አሳ ወርሳ ሙሬኖን ባሌላዳሳ።

24 ኢዚ ጊዶን ናቤታ ሱንሲ፣ ጌሻታ ሱንሲ፣ ቢታ ቦላ አሳ ኩሺን ሃይቂዳይታ ኡባታ ሱንሲ ቤቲዴስ” ጊሼ ዱጌ አባ ጊዶ ዩጊዴስ። *

19

1 ሄሳፌ ጉዬ ዳሮ አሳ ቃላ ጊሪስ ሚሳቲዛ ጊታ ቃላ ጊሪስ ሳሎፔ “ሃሌ ሉያ! አቶቴሲ፣ ቦንቾይ፣ ዎልቃይካ ኑ ጎዳሳ።

* 2 ኢዛ ፐርዳይ ቱማኔ አዳ፤ ኢዛ ቢታ ባ ላይማቴሳን ቱኒሲዳ ዎጋ ጊታ ላይማዮ ኢዚ ባ ፐርዳን ኢዞ ቃዓይዴስ፤ ኢዞ ቃዓይዳ ባ አሳንቻታ ሱላ ሃሎ ኬሲዴስ” ጊሺን ታ ሲያዲስ። 3 ቃሴካ “ሃሌ ሉያ፤ ኢዚፔ ኬዚዛ ጩዋይ ሜርናፔ ሜርና ጋካናስ ፑዴ ጩዋቲሼ ዴዓና” ጊሼ ዋሲዳ። *

4 ናምዑ ታማኔ አይዱ ጩማቲኔ አይዱ ዶዓቲ አልጋ ቦላ ኡቲዳ ያሳስ ባ ሊጴ ቦላ ኩንዲዲ “አሚን፤ ሃሌ ሉያ!” ጊሼ ኢዛስ ጎይኒዳ።

ዶርሳዛ ሳርጌ ዲጊሳ

5 ሄሳፌ ጉዬ “ኢዛስ ያዩዛ ኢዛ አሳንቻቲ ወሪካ ጉሳቲኔ ጊታቲ ኑ ጎዳ ጋላቲቴ” ጊዛ ቃላይ አልጋፌ ኬዚዴስ። * 6 ዳሮ አሳ ቃላ ጊሪስ ሚሳቲዛይ፣ ሻፋ ሃላ ጊሪስ ሚሳቲዛ ጊሪስ፣ ዎልቃማ ዳዳ ጊሪስ ሚሳቲዛ ጊሪስ “ሃሌ ሉያ! ወርሲ ዳንዳዩዛ ጎዳይ ካዎቴስ! *

7 ዶርሳዛ ሳርጌ ጋላሲ ጋኪዳ ጊሺኔ ኢዛ ሚሺራያ ጊጌታ ኡቲዳ ጊሽ ሃ ዩቴ፤ አኔ ኡፋዬቶስ! አኔ ኡፋይሳን ኢዛ ቦንቾስ። 8 ኢዛ ያልቁቲዛ ጌሻ ሎዎ ማይዎ ማይዓና ማላ ኢዚስ ኢሜቲዴስ” ጊሺን ሲያዲስ። ሄ ሌዔ ማይዎዚ ጌሻታ ዒሎቴሳ አሶ።

9 ሄሳፌ ኪታንቻዚ ታና “ጌዴ ዶርሳዛ ሳርጌስ ዒይጌቲዳይቲ አንጄቲዳይታ ጋዳ ገፋ” ጊዴስ። ካሌሲዲካ “ሃይሲ ቱሙ ያሳ ቃላ” ጊዴስ። *

10 ታካ ሄ ኪታንቻዛስ ጎይናናስ ኢዛ ቶሆ ቦላ ታ ሊጴን ጉፋናዲስ-ሺን ኢዚ ታና “አጋ! ሄሳሶ አሶፋ! ታካ ኔናራ

* 18:24 ኤር 51:49 * 19:1 ሃሌ ሉያ ቢሪሼላይ ኢብራዌታ ቃላራ “የሲ ጋላቴቶ” ጉሳ። * 19:3 ኢሳ 34:10 * 19:5 ማዛ 115:13 * 19:6 ሄዚ 1:24፤ ማዛ 93:1፤ 97:1፤ 99:1 * 19:9 ማቶ 22:2-3

ዮሱስ ኪርስቶስ ማርካቴስ አይኪዳ ኢሻታራ ኢሲፌ አሲዛዴ፤ ኔኒ ያሳስ ጎይና! ዮሱሳ ማርካይ ቲንቤቴ አያና” ጊዴስ።

በላ ፓራ ቶጊዳዴ

11 ሄሳፌ ጉዬ ሳሎይ ዶዬቲዳይሳ ታ ቤያዲስ። ቃሴካ በላ ፓራካ ቤያዲስ። ሄ ፓራዛ ቶጊዳይሲ አማኔቲዳዴኔ ቱማንቻ ጌቴቲዛዴ። ኢዚ ቃስ ቱማን ፐርዴሲኔ አሌቴስ። * 12 ኢዛ አይፌቲ ታማ ላጮ ሚሳቴቴስ። ኢዛ ሁዔ በላ ዳሮ ዛዉዴቲ ዴቴስ። ኢዛፔ አቲን ሃራ አሲ አኒካ ኤሮንታ ሱንሲ ኢዛ በላ ፃፌቲ ኡቲዴስ። * 13 ኢዚ ቃስ ሱሳን ማዴቲዳ ማይዎ ማይዲዴስ። ኢዛ ሱንሳይ ቃስ “ያሳ ቃላ” ጌአቴቴስ። 14 በላ ፓራታ ቶጊዲ በላኔ ጌሽ ጊዲዳ ሎዎ ማይዎ ማይዲዳ ሳሎ አላንቻቲ ኢዛ ካሊዳ። 15 አይዛቤታ ኢዛራ ቃንጊዛ ቃራ ማሻይ ኢዛ ዱናፔ ኬዜስ። ኢዚ ኢስታ ቢራታ ጉፌራ ሃራና። ኢዚ ዉርሲካ ዳንዳዩዛ ያሳ ሚኖ ሃንቆ ቆንጨሲዛ ዎይኔ ጫጄ ዮዲዛሶን ኢስታ ዮዳና። * 16 ኢዛ ማይዎ በላኔ ኢዛ ዎዲራ በላ “ኢዚ ካዎታስ ካዎ፣ ጎዳታስ ጎዳ” ጊዛ ሱንሲ ፃፌቲ ኡቲዴስ።

17 ሄሳፌ ጉዬ ቃስ አዋ አርሼ በላ ኤቂዳ ኢሲ ኪታንቻ ቤያዲስ። ኢዚ ቃስ ሳሎ በላ ፐራዲዛ ካፎታስ “ዎጋ ያሳ ዲጊሳ ማናስ ሃ ዩቴ! ሃ ሺቂቴ! 18 ካዎታ አሾ፣ አላንቻታ አዛዚዛይታ አሾ፣ ጎባ አላንቻታ አሾ፣ ፓራታ አሾኔ ፓራ ቶጊዛይታ አሾ፣ ጎዳታ አሾኔ ኢስታ አሽካራታ አሾ፣ ጉላ ናይታኔ ጨማ አሳታ አሾ ጊዲዳ አሳ ኡባ አሾ ሃ ዩዲ ሚቴ!” ጊሼ ጊታ ቃላን ዋሲዴስ

19 ሄሳሶካ ዶዳዚኔ ቢታ ካዎቲ ኢስታ አላ አሲካ በላ ፓራ ቶጊዳይሳራኔ ኢዛ አሳ አሳራ አሌታናስ ሺቂዳይታ ቤያዲስ። 20 ጊዶ አቲን ሄ ዶዳዚ አይኬቲዴስ። ካሴ ኢዛራ ዳሮ ማላታ አሲዳ ዎርዶ ናቤዚካ ኢዛራ አይኬቲዴስ። ኢዚ ቃስ ሄ ዶዳዛ ማላታይ ኢስታ በላ ዲዛይታኔ ሄ ዶዳዛ ሚሲሌዛስ ጎይኒዳይታኔ ጊታ ማላታታ አሲ አሲዲ ኢስታ ባሌሲሼ ጋምዲዴስ። ሄይቲ ናምዓቲ ዲኔ ጌቴቲዛ ታማን ኤጊዛ ታማ አባን ሃይቆንታ ፓፃ ዲሼ ዮጌቲዳ። * 21 ሃንኮ አቲዳይቲ ቃስ በላ ፓራ ቶጊዳይሳ ዱናፔ ኬዚዳ ማሻን ሃይቂዳ፤ ካፎቲካ ዉሪ ኢስታ አሾዛ ሚ ካሊዳ።

20

ሺ ላይሳ ካዎቴስ

* 19:11 ሂዚ 1:1-3፤ ማዛ 96:13፤ ኢሳ 11:4 * 19:12 ዳኔ 10:6
* 19:15 ማዛ 2:9፤ ኢሳ 63:3፤ ኢዩ 3:13፤ አጃ 14:20 * 19:20 አጃ 13:1-18

1 ሃሳፌ ጉዬ ጨማ አላዛ ዶዬዛ ቁልፔኔ ጊታ ሳንሳላታ ባ ኩሼን አይኪዳ ኪታንቻይ ሳሎፔ ዱጌ ዎዲሺን ታ ቤያዲስ።
 2 ሄ ዳዌዛ አይኪዲ ሺ ላይሰ ቃቺዴስ። ሄሲ ዳዌዚ ዳቡሎሳ ዎይቲ ፃላዔ ጌቴቲዛ ካሴ ቤኒ ሾሻዛ። * 3 ሺ ላይሰ ጋካናስ ኢዚ ዴሬ አሳ ባሌሶንታ ማላ ሄ ኪታንቻዚ ዳዌዛ ዱጌ ጨማ አላን ዬጊዴስ፤ ኢዛ ቦላ ጎርዲዲ ማታማ ዎሲዴስ። ኢዚ ሃሳፌ ጉላ ዎዴስ ቢርሼታናስ ቤሴስ።

4 ሃሳፌ ጉዬ ታኒ አልጋታ ቤያዲስ። ሄ አልጋታ ቦላ ፒርዳ ፒርዳናስ ጎዳቴሲ ኢስታስ ኢሜቲዳይቲ ኡቲዳይታ ቤያዲስ። ቃሴካ ዩሱሳ ጊሽ ኢስቲ ማርካቲዳ ጊሺኔ ያሳ ቃላ ጊሽ ኢስታ ቆዴይ ቃንጌቲዳ አሳታ ሹምፖካ ቤያዲስ። ሄይታንቲ ዶዳዛሲኔ ኢዛ ሚሲሌዛስ ጎይኒቤቴና። ኢዛ ማላታካ ባ ሊጴ ቦላ ጊዲን ባ ኩሼ ቦላ ዎሶንታይታ። ኢስቲ ሃይቆፔ ዴንዲዳ ኪርስቶሳራ ኢሲፌ ሺ ላይሰ ካዎቲዳ። * 5 ሃንኮ አቲዳ ሃይቆሳቲ ቃስ ሄ ሺ ላይሳይ ፖሌታና ጋካናስ ሃይቆፔ ዴንዲቤቴና። ሄሲካ ሃይቆፔ ኮይሮ ዴንሳ። 6 ኮይሮ ዴንሳን ዲዛይቲ ሄይቲ አንጄቲዳይታኔ ጌሻታ። ናምግንሶ ሃይቆይ ኢስታ ቦላ ዎልቃይ ዴና። ኢስቲ ያሳ ቁሴታኔ ኪርስቶሳ ቁሴታ ጊዳና። ኢስቲ ኪርስቶሳራ ሺ ላይሰ ካዎታና።

ፃላዔ ያኔቴሰ

7 ሄ ሺ ላይሳይ ፖሌቲዳ ማላ ፃላዔይ ባ ቃሹቲዳሶፔ ቢርሼታና። 8 አሳሜ ቦላ ዲዛይቲ ሄይቲካ ጎጌኔ ማጎጌ ጌቴቲዛይታ ባሌሳናሲኔ ኢስታ አላስ ኤኪ ባናስ ኬዛና፤ ሄይታንታ ቆዳይ አባ አቻን ዲዛ አጩ ማላ። * 9 ኢስቲ ኩሜሳ ቢታ ቦላ ላሌቲዲ ጌሻቲ ዲዛሶዮ ዶሴቲዳ ካታማዮ ጊዶሲዳ ሺን ሳሎፔ ዎዲዳ ታማይ ኢስታ ዲፒ ሂስቲ ፀ-ጊዴስ። 10 ካሴ ኢስታ ባሌሲዳ ዳቡሎሲ ሄ ዶዳዚኔ ዎርዶ ናቤዚ ዲዛሶይ ዲኔን ኤፃዛ ታማ አባ ጊዶን ዩጌቲዳ። ኢስቲ ሄን ቃማኔ ጋላስ ሜርናፔ ሜርና ጋካናስ ፀ-ጌታና።

11 ሃሳፌ ጉዬ ኢሲ ጊታ ቦላ አልጋኔ ሄ አልጋ ቦላ ኡቲዳይሳ ቤያዲስ፤ ቢታይኔ ሳሎይ ኢዛ ሲንሳፌ ባቃቲዳ ሺን ኢስቲ ቢዲ ጌላናሶይ ቤቴቤና። * 12 ሄ አልጋዛ ሲንሳን ሃይቂዳ ጨማታኔ ናቴላታ ቤያዲስ። ማፃፋቲካ ዶዩቲዳ ሃራ ዴዎ ማፃፋይካ ዶዩቲዴስ፤ ሃይቂዳይቲካ ማፃፋታን ካሴ ፃፌቲ ዲዛ ባ አሶ አሶ ማላ ፒርዳ ኤኪዳ። 13 አባይካ ባ ጋርሳን ዲዛ ሃይቂሳታ ኢሚዴስ። ሃይቆይኔ ዱፎይ ቃስ ባ ጊዶን ዲዛይቲ

* 20:2 ሜዴ 3:1 * 20:4 ዳኔ 7:9፥22 * 20:8 ሃዚ 38:2፥9፥15
 * 20:11 ዳኔ 7:9-10

ካሴ ሃይቁዳይታ ኢሚዳ። ኢሲ ኢሲ አሲ ባ አሶ አሶ ማላ ፒርዳ ኤኪዴስ። 14 ሃይቆይኔ ዱፎይ ታማ አባ ጊዶ ዩጌቲዳ። ሄ ታማ አባዚ ናምዓንጎ ሃይቆ። 15 ኢዛ ሱንሳ ዴዎ ማፃፋን ፃፌቶንታዴይ ዉሪካ ታማ አባን ዩጌቲዴስ።

21

አራሳ ሳሎኔ አራሳ ሳዓ

1 ሄሳፌ ጉዬ ታኒ አራሳ ሳሎኔ አራሳ ሳዓ ቤያዲስ። ካሴ ሳሎይኔ ካሴ ቢታይ አዲ ቢዳ። ሃይሳፌ ጉዬ አባይካ ዴና። *
2 ጌሻ ካታማያ አራሳ ዩሩሳላሜይ ባ አዚናስ ጊጌቲዳ ሚሽራ ማላ ሎዓ ጊጌታዳ ሳሎ ያሳ አቻፌ ዎዲሺን ታኒ ቤያዲስ። *
3 አልጋዛፔ “ሄኮ ያሳ አቆሶይ አሳራ ዴስ። ኢዚ ኢስታራ ዳና። ኢስቲካ ኢዛ ዴሬታ ጊዳና። ያሲ ባ ቦንቾን ኢስታራ ኢሲፌ ጊዳና። ኢዚ ኢስታ ያስ ጊዳና። * 4 ኢዚ ኢስታ አይፌፔ አፋንሳ ዉርሲ ቁጫና። ካሴ ዎጋይ አዲዳ ጊሽ ሃይቆይ ዎይኮ ሙዞቴሳ ዎይኮ ዩሆይ ዎይኮ ዋዬይ ሃይሳፌ ጉዬ ዴና” ጊዛ ጊታ ቃላይ ኬዚሺን ታኒ ሲያዲስ። *

5 ሄ አልጋ ቦላ ኡቲዳይሲካ “ሄኮ ታኒ ዉርሳካ አራሳ ኬሳና!” ጊዴስ። ቃሲካ ታና “ሃይሲ ቃላዚ አማኔቲዳ ቱሙ ጊዲዳ ጊሽ ኔ ሃይሳ ፃፋ!” ጊዴስ። 6 ሄሳፌ ጉዬ ታስ “ፖሌቲዴስ! አልፋይኔ አሜጋይ፤ ኮይሮይኔ ዉርሴሳ ታና፤ ሳሞቲዳዴስ ታኒ ዴዎ ፕልቶ ሃሴ ሚሽ ቃንጊሶንታ ኢዛስ ጮ ሜላ ኢማና። *
7 ያኒዳዴይ ሃይሳ ላታና። ታካ ኢዛዴስ ያሳ ጊዳና። ኢዚካ ታስ ና ጊዳና። * 8 ጊዶ አቲን ሃንኮ ባቦቲ፤ ኢስታስ አማኔቶንታይቲ፤ ቱናቲ፤ አሳ ሽምፖ ዎዲዛይቲ፤ ሳይማቲዛይቲ፤ ቢቲዛይቲ፤ ኤቃስ ጎይኒዛይቲ፤ ዎርዶቲዛይቲ፤ ሄይታ ኡባታ ቃዳይ ዲኔን ኤጊዛ ታማ አባ ጊዶን ጊዳና። ሄሲካ ናምዓንጎ ሃይቆ” ጊዴስ።

አራሳ ዩሩሳላሜ

9 ዉርሴሳን ላፑን ቦሻቲ ኢስታን ኩሚዳ ላፑን ፀዋታ አይኪዳ ላፑን ኪታንቻታፔ ኢሶይ ታኮ ዩዲ ታና “ሃ ያ! ታ ኔና ዶርሳዛ ማቼዮ ሚሽራዮ ቤሳና” ጊዴስ። 10 ኢዚ ታና አያናን ኢሲ ጊታ ጵቃ ዙማ ቦላ ኬሲዲ ጌሻ ካታማያ አራሳ ዩሩሳላሜይ ያሳ አቻፌ ሳሎፔ ዎዲዛሮ ቤሲዴስ። * 11 ኢዛካ ያሳ ቦንቾን ፖሲሳዉስ።

* 21:1 ኢሳ 65:17፤ 66:22፤ 2ጴፀ 3:13 * 21:2 ኢሳ 52:1፤ አጁ 3:12፤ ኢሳ 61:10 * 21:3 ሂዚ 37:27፤ ሌዌ 26:11-12 * 21:4 ኢሳ 25:8፤ 35:10፤ 65:19 * 21:6 ኢሳ 55:1 * 21:7 2ሳሜ 7:14፤ ማዛ 89:26-27 * 21:10 ሂዚ 40:1-2

ኢዚ ፖዞሃ ሎዔቴሳይ ቃስ ኬሂ ቦንቼተዛ ሹቻ ማላኔ ቢሪሌ ማላ
 ጌሺኔ ኢያሲጲዴ ጌቴተዛ ኢንቆ ማላ። 12 ኢዚስ ታማኔ ናምዑ
 ፔንጌታራ ዲዛ ጊታ አዱሳ ጊንቤ ላሻይ ዴስ። ሄ ታማኔ ናምዑ
 ፔንጌታን ታማኔ ናምዑ ኪታንቻቲ ኤቂዲ ናጌቴስ። ሄ ፔንጌታ
 ቦላ ታማኔ ናምዑ ኢስራዔሌ ኮቻታ ሱንሳ ፃፌቲ ኡቲዴስ።
 13 አርሼይ ሞኪዛ ባጋራ ሄሹ ፔንጌይ ዴስ። ፑዴ ባጋራ ሄሹ
 ፔንጌይ ዴስ። ዱጌሃ ባጋራ ሄሹ ፔንጌይ ዴስ። አርሼይ ዉሊዛ
 ባጋራ ሄሹ ፔንጌይ ዴስ። 14 ሄ ካታማይ ጊንቤ ላሻዛስ ታማኔ
 ናምዑ ሞና ማሳራቴቲ ዴቴስ። ሄ ማሳራቴታ ቦላ ታማኔ ናምዑ
 ሄ ዶርሳዛ ሃዋሬታ ሱንሳ ፃፌቲ ኡቲዴስ።

15 ሄሳ ታስ የቲዳ ኪታንቻዛስ ሄ ካታማየኔ ኢዚ ፔንጌታ
 ቃሴካ ሄ ጊንቤ ላሻዛ ኢዛራ ዋዲዛ ዎርቃ ዛንጌይ ዴስ። *
 16 ሄ ካታማይ አዱሳቴሴኔ አሆቴሴ አይዱ ባጋራካ ኢሲ ጊና።
 ሄ ኪታንቻይካ ካታማየ ባ ኢዛራ ዋዲዛ ዋዳ ዛንጌዛራ ዋዲን
 አዱሳቴሳይ ታማኔ ናምዑ ሺ ኪሎሜቲሬ ማላ ጊዲዴስ። ኢዚ
 ዶቃቴሴኔ አሆቴሴካ ኢዚ አዱሳቴሳ ጊና ጊዲዴስ። 17 ኪታንቻዚ
 ጊንቤዛ ዋዲዴስ። ሄ ኪታንቻዚ ኢዛራ ዋዲዛ ሚሻዚ ኤሬቲዳ ዋዳ
 ሚሻዚ ዪታኔ አይዱ ታማኔ አይዱ ሜትሬ ማላ ጊዲዴስ። 18 ሄ
 ጊንቤዚ ጊንቤቲዳይ ኢያሲጲዴ ጌቴተዛ ሹቻና። ሄ ካታማያካ
 ማስቶቴ ማላ ጌያ ኡቲዳ ጌሻ ዎርቃፌ አሴታዱስ። * 19 ሄ
 ካታማይሲ ጊዶ ማሳራቴ ሹቻይ ዱማ ዱማ አልዎ ሹቻን ሎዒ
 ጊጊዴስ። ኮይር ማሳራቴዚ ኢያሲጲዴ፣ ናምዓንጾዚ ሲምፔሬ፣
 ሄቫንጾዚ ኬልቄዶኔ፣ አይዳንጾዚ ማርጊዴ፣ 20 ኢቻሻንጾይ
 ሳርዶንኪሴ፣ ኡሱፑንጾይ ሳርዲዮኔ፣ ላፑንጾይ ኪርስቶሎ።
 አስፑንጾይ ቢሪሌ፣ ኡዱፉንጾይ ቶጳዚዮኔ [ዉራዉሬ]፣ ታማንጾይ
 ኪሪስጲራሲሴ፣ ታማኔ ኢሲንጾይ ያኪንቴ፣ ታማኔ ናምዓንጾይ
 አሜቲስዒኖሴ ጌቴተዛ ሹቻታፔ። 21 ሄ ታማኔ ናምዑ ፔንጌቲካ
 ታማኔ ናምዑ ኢንቆታ። ፔንጌቲ ዉሪካ ኢሶይ ኢሶይ ኢሲ
 ኢንቆፌ አሴቲዳ ሄ ካታማይ ጊዶ አጌይ ማስቶቴ ማላ ሃ ዛሪ
 ቤሲዛ ሙሩታ ዎርቃፌ አሴቲዴስ።

22 ዉርሲ ዳንዳዩዛ ጎዳ ያሲኔ ዶርሳዚ ኢዚስ ያሳ ኬሴ ጊዲዳ
 ጊሽ ሄ ካታማይ ጊዶን ሃራ ያሳ ኬሴ ቤያቤኬ። 23 ያሳ ቦንቾይ
 ኢዚስ ፖዒዛ ጊሺኔ ዶርሳዚ ኢዚ ፖዎ ጊዲዳ ጊሽ ሄ ካታማይስ
 አዋ አርሼይ ዎይኮ አጊናይ ፖዒሳናስ ኮሼና። * 24 ዴሬቲ ኢዚ
 ፖዞዛን ሲሜሬታና። ቢታ ካዎቲ ዉሪካ ባ ቦንቾ ኢዚስ ኤሃና።
 25 ሄ ካታማይን ቃማይ ባይንዳ ጊሽ ኢዚ ፔንጌቲ አይ ዎዴካ
 ጎርዴቴቴና። 26 ሃራ ካዎታ ጊታቴሴኔ ቦንቾይ ኢዚስ ያና።

* 21:15 ሂዚ 40:3 * 21:18 ኢሳ 54:11-12 * 21:23 ኢሳ 60:19-20

27 ሃራሲዛ ሚሺ ሙሌካ ጌዴ ኢዚን ጌሌና። ቱናቴስ አሲዛይቲኔ ምርዶ ሃሳዩዛይቲ ሙሌካ ሄ ኢዚኮ ጌሌቴና። ሄ ኢዚን ጌላናይታ ሱንሴ ካሴ ሄ ዶርሳዛ ዴዎ ማፃፋን ፃፌቲዳይታ ፃላላ። *

22

1 ሄሳፌ ጉዬ ሄ ኪታንቻዚ ያሳ አልጋፌኔ ዶርሳዛ አልጋፌ ኪዚዛ ማስቶቴ ማላ ጊሎ ቁገዢ ጊዳዳ ዴዎ ሃሳ ሻፋ ታና ቤሲዴስ።
2 ሄ ሻፋዚ ሄ ካታማይስ ዋና ኦጌዛ ጊዶ አዳን ሻኪ ዩጊዲ አቋ ቤስ። ሄ ሻፋዛስ ሃዲርሳ ባጋራኔ ኡሻቻ ባጋራ አጊናን አጊናን ፓጩይ ባይንዳ ላይሳን ታማኔ ናምዑ አጊና ኩሜስ አይፊዛ ዴዎ ሚሲ ዴስ። ሄ ሚሳ ሃይሳይ ዴሬ ፓሴስ።
3 ሄሳፌ ጉዬ ቃንጌስ ሙሌካ ዴና። ያሳ አልጋይኔ ዶርሳ አልጋይ ሄ ካታማይን ዳና። ኢዛ አሳንቻቲ ኢዛስ ጎይናና።
4 ኢስቲ ኢዛ አይፌሶ ቤያና። ኢዛ ሱንሴ ኢስታ ሲጴ ቦላ ዳና።
5 ሄሳፌ ጉዬ ቃማይ ዴና። ጎዳ ያሲ ኢስታስ ፖዲዛ ጊሽ ታማ ፖይይ ዎይኮ አዋ አርሼ ፖይይ ኢስታስ ኮሼና። ኢስቲ ሜርናፔ ሜርናስ ካዎታና።

ዩሱሳስ ናምዓንሶ ዩስ

6 ሄሳፌ ጉዬ ኪታንቻዚ ታስ “ሃይቲ ቃላቲ አማኔቲዳይታኔ ቱማታ። ናቤታ ሃሳይሲዛ ጎዳ ያሲ ማታ ዎዴ ሃናናይሳ ባ አሳንቻታስ ቆንጩሳናስ ባ ኪታንቻዛ ኪቲዴስ” ጊዴስ።

7 ዩሱሲካ “ሄኮ ታ ኤሶን ያና፤ ሃይሳ ማፃፋዛ ቲንቢቴ ቃላ ናጊዛዴይ ኢዚ አንጄቲዳዴ” ጊዴስ።

8 ሃይታ ሃ ዮዎታ ሲዩዳይኔ ቤዩዳይ ታና ዮሃንሳ። ታኒ ሃይታ ሃ ዮዎታ ሲዩዳ ዎዴኔ ቤዩዳ ዎዴ ሃይታ ሃ ዮዎታ ታና ቤሲዳ ኪታንቻዛ ሲንላን ኢዛስ ጎይናናስ ሆካዳ ኢዛ ቶሆ ቦላ ኩንዳዲስ።

9 ሄ ኪታንቻዚ ቃሴ “ሃይሶ አጋ! ሃይሳሶ አሶፋ! ታካ ኔናራ ኔ ኢሻታራኔ ናቤታራ ቃሴካ ሃይሳ ማፃፋዛ ቃላ ፖሊዛ አሳታራ አሲዛዴ። ኔኒ ያሳስ ፃላላ ጎይና” ጊዴስ።
10 ቃሴካ “ዎዴይ ማቲዳ ጊሽ ኔኒ ሃይሳ ማፃፋዛን ፃፌቲዳ ቲንቢቴ ቃላ ማታሜን ጎርዶፋ።
11 ሃይሳፌ ጉዬ ማካልዛይ ጉጂ ማካሎ፣ ቱናይካ ቱኖ፣ ሂሎይካ ጊሊ ካሎ፣ ጌሻይካ ጌዮ” ጊዴስ

12 “ሄኮ! ታ ኤሶን ያና! ኢሳዴስ ኢሳዴስ ኢዛ አሶ ማላ ታ ኢዛስ ኢዛስ ኢማና ዋጋ ታኒ ታ ኩሼን አይካ ኡታዲስ።

13 አልፋይኔ አሜጋይ፣ ሲንሴኔ ጉዬይ፣ ኮይሮይኔ ዉርሴሴ ታና” ጊዴስ።

* 21:27 ኢሳ 52:1፤ ሂዚ 44:9

14 ሄ ደዎ ሚሳ አይፌ ማናሲኔ ሄ ካታማዮ ኢዚ ፔንጌራ ጌላናስ ቤሲዛይቲ ባ ማይዎ ሜጪዳይቲ አንጄቲዳይታ። 15 ካና ማላ ጮ ሆሱ ሆሲዛይቲ ቢታ ቢቲዛይቲ፣ ላይማቲዛይቲ፣ ሼምፖ ዎዲዛይቲ፣ ኤቃስ ጎይኒዛይቲ፣ ዎርዶ ሲቂዛይቲኔ ዎርዶ አሲዛይቲ ዉሪካ ሄ ካታማይፔ ካሬን አታና።

16 “ታኒ ዮሱሲ ሃይሳ ኢንቴስ ማርካታና ማላ ታ ኪታንቻዛ ዎሳ ኪሳታስ ዮዳዲስ። ታስ ዮሌቴሳ ዛርኬይኔ ቆሞይ ካሴ ዳዉቴኮ። ታኒ ፖሲሲዛ ዎንታ ያሊንቴ።”

17 ዒሎ አያናይኔ ኢዛ ሚሺራያ “ሃያ!” ጌቴስ። ሄሳ ሲዩዛይይካ “ኔ ሃያ!” ጎ። ሳሞቲዳዴይካ ሃዮ፣ ኮይዳዴይ ደዎ ሃሴ አይኮ ዋጋካ ቃንዎንታ ጮ ሚላ ኡዮ።

18 ሄኮ ታኒ ሃይሳ ማፃፋዛን ፃፌቲዳ ቲንቢቴ ቃላ ሲዩዛይቲ ናጌታና ማላ ዮታይስ። አኒካ ሃይሳ ሃ ቃላ ቦላ አይኮካ ጉጂኮ ሃይሳ ሃ ማፃፋዛን ፃፌቲዳ ቦሻታ ያሲ ኢዛ ቦላ ጉጃና። 19 አኒካ ሃይሳ ቲንቢቴ ማፃፋን ፃፌቲዳ ቃላታፔ ኢሲኖካ ፓጪሲኮ ሃይሳ ሃ ማፃፋዛን ዮቴቲዳ ደዎ ሚሳ አይፌፔኔ ጌሻ ካታማይፔ ያሲ ኢዛ ጊሻዛ ፓጪሳና።

20 ሃይታንታ ታ ማርካቲዛይሲ “ታኒ አዳፌ ኤሶን ያና!” ጌስ። አሚን! ጎዳ ዮሱሳ ሃያ።

21 ጎዳ ዮሱሳ ኪያቴሲ ኢንቴናራ ኡባትራ ጊዶ። አሚን! *

* 22:21 ኡባታራ ኢሲ ኢሲ ጌሻ ማፃፋቲ “ዉሪሶታራ” ጊሺን ሃራይቲ ቃሴ “ዎሳ ዴሬታራ” ጌቴስ። ቃሴካ “ዎሳ ዴሬ ኡባታራ” ጊዛይቲካ ዴቴስ።

አራሳ ጫቆ ማገፋ ጋሞላ

New Testament in Gamo (ET:gmv:Gamo)

copyright © 2011 Wycliffe Bible Translators, Inc.

Language: Gamo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gamo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 22 Sep 2022 from source files
dated 29 Jan 2022
dffa0cbb-5f77-5875-bf95-f4176677af45